

# ጳውሎስ ቆርንቶሳ አሳው ፃፊዳ ኮይር ኪታ ጌሉዋ

ጳውሎስ ቆርንቶሳ አሳው ፃፊዳ ኮይር ኪታይ፡ ጳውሎስ ቆርንቶሳ ካታማን ዳዒያ አማኒያዋንቱ ጊደን ኪሪሰቲና ዳዑዋን አማኑዋ ፃለያባን ዳንዴዳ ማቱዋ ቆፒሳናው ቆፒዳ ፃፊዳዋ። ህ ዋዴ ቆርንቶሳ ካታማይ ህ ጋዴን ዳዒያ አሳይ ጎዔቲያ ኤሬቴዳ ጊሪኬ ካታማ። ህዋ ቦላካ ቃሲ አካዪያ ጌቲቲያ ሮማ ካወቲሳሲ ሁጹ ካታማ። ህ ካታማይ ዋልቃማ ዘለዒያን፡ ጋሚዒዳ ሚኔዳ ዋጋን፡ ሎይሲ አኪ አኪ ቢያ ዬዳ ዳዑዋን ዋይ ጊጌናባ ሃኒያዋኒኔ ሃይማኖቲያ ጮራቴላን ኤሬቴዳዋ።

ዬሱሲ ኪቲዳዌ ሚኒሲዳ ኦዳናው ኮዬዳዌ፡ ህ አማኒያዋንቱ ጊደን ዳዒያ ሻኮቴላባኔ ዬዳ ዳዑዋባ፡ ዋሹማባኔ ጌሉዋ አካባ፡ ዋሳ ጎሌ ዋጋባ፡ ጌሻ አያና አሞታቱዋባኔ ሃይቁዋ ዳንዲዋባ። ዬሱሲ ኪቲዳዌ ሃ ሚሺራቹዋ ቃላ ሃ ኦሻቱዋ ቦላ ሚኒሲዳ ኦዲያዋ ናጊዴ ሺሺ።

ሲቁ ያሳይ ባሬ አሳሲ አሜዳ አሞታ ኡባፔ አዲያዋ ጊዲያዋ ኦዲያ ሸምፑዋ ታማኔ ሄዙ፡ ሃ ማፃፋን ዳር ኤሬቴዳዋ ጌቲቲዳ ቆፊቲ።

## ሸምጋቱዋ ኡባቱዋሲ አሜቴዳ ቃንሳ ቆፋቱዋ ጌሉዋ (1:1-9)

- አማኒያዋንቱ ጊደን ዳንዴዳ ሻኮቴላ (1:10-4:21)
- ዬዳ ዳዑዋባኔ ስይ አሳ ዳዑዋባ (5:1-7:40)
- አማኒያዋንታኔ ኪሪሰቲና አማኑዋ አኪቤናዋንታ (8:1-11:1)
- አማኒያዋንቱ ዳዑዋን ጎሺታ ዋጋ (11:2-14:40)
- ኪሪሰቶሲ ሃይቁዋ ያኒ ዳንደዋኔ አማኒያዋንቱ ዳንዲዋባ (15:1-58)
- ዪሁደን ዳዒያ ማቶታንቻቱዋሲ አሜቴዳ ማዲዋባ (16:1-4)
- ወርሴላ ቁቲያ (16:5-24)

1 ታኒ፡ ያሳ ሸኒያን ዬሱሲ ኪሪሰቶሲ ኪቲዳዋ ጊዳናው ፃሴቴዳ ጳውሎስኔ፡ ኑ አሻ ሶሰቴኒሲ፡

2 ቆሮንቶሳን ዳዲያ ያሳ አማኒያ አሳቱዋሁ፤ ዩሱሲ ኪሪስቶሳን ጌዬዳዋንቱሴ፤ ኑሲ ጎዳ ጊዲያ ኑ ጎዳ ዩሱሲ ኪሪስቶሳ ሱንላ ኡባ ሳሳን ያሲያ ኡባቱዋና ጌሻ ጊዳናው ያሴቴዳዋንቱሴ ሃ ዳቢዳቢያ ፃሬቶ።

3 ያሳይ፤ ኑ አወኔ ኑ ጎዳይ ዩሱሲ ኪሪስቶሲ ሂንቴንቱሴ አጼ ኬካቴላኔ ሳርቴላ አሞ።

**ያሳ ጋላቱሳ**

4 ያሳይ ኪሪስቶሳ ዩሱሳ ባጋና ሂንቴንቱሴ አሜዳ አጼ ኬካቴላ ዲራው፤ ታኒ ኡባ ዋዴ ሂንቴንቱሴ ያሳ ጋላታይ።

5-6 ታኒ ኪሪስቶሳሲ ማርካቲያዌ ሂንቴንቱን ማኔዳ ዲራው፤ ሂንቴ ኡባባኒ፤ ሃሳያ ኡባን ኤራቴላ ኡባን፤ አኒ ዲራቴዲታ።

7 ሃዋዳን ሂንቴ ኑ ጎዳ ዩሱሲ ኪሪስቶሳ ዩሳ ናጊሺን፤ አያና አሞታፔ ሃራይ አቶ አቱኔ ሂንቴንቱሴ ፓጩና።

8 ቃሲ ኑ ጎዳ ዩሱሲ ኪሪስቶሳ ጋላሳን ሂንቴ ካጼ ባይናዋንታ ጊዳናዳን፤ ወርሴላይ ጋካናው ኢ ሂንቴንታ ማኒሳናዋ።

9 ባሬ ናባ ኑ ጎዳ ዩሱሲ ኪሪስቶሳ ኢቴፔቴላው ሂንቴንታ ያሴዳ ያሳይ አማኔቴዳዋ።

**አማኒያ አሳ ጊደን ሻኩቴላይ ማጼቶፖ**

10 ሺን ታናዳን አማኒያዋንቶ፤ ኢቲ ዋዛናኒኔ ኢቲ ቆፋን ኢቲፔ ጊዳናፔ አቲን፤ ሻኩቴላይ ሂንቴ ጊደን ዴዔና ማላ፤ ሂንቴ ኡባይ ኢቲ ሃሳያ ሃሳያናዳን፤ ኑ ጎዳ ዩሱሲ ኪሪስቶሳ ሱንላን ታኒ ሂንቴንታ ዋሳይ።

11 አዪሲ ጎፔ፤ ታናዳን አማኒያዋንቶ፤ ቃሎባ ሶይ አሳይ ሂንቴንቱባ፤ ሂንቴ ጊደን ዋላሳይ ዴዒያዋ፤ ታው ኦዴዲኖ።

12 ታኒ ጊያዌ ሃዋ፤ ሂንቴንቱ ሁጲያን ሁጲያን፤ «ታኒ ጳውሎሳዋ። ታኒ አጲሎሳዋ። ታኒ ኬፋዋ። \* ታኒ ኪሪስቶሳዋ» ያጊታ።

13 ኪሪስቶሲ ሻኬቴዴ? ሂንቴንቱ ዲራው፤ ማሰቃሊያ ቦላ ሚሲማሪያን ጳሺቴዴ ካቄቴዳዌ ጳውሎሴ? ዋይ ሂንቴ ጳውሎሳሲ ጊዳናው ፃማቄቴዲቲ?

14 ታኒ ቃሪሲጳሳፔኔ ጋዮሳፔ አቲን፤ ሂንቴንቱፔ ኦናኔ ፃማቃቤና ዲራው፤ ያሳ ጋላታይ።

15 ሄዋ ዲራው፤ ኦኒኔ ሂንቴንታ ታው ጊዳናዳን ፃማቄቴዲታ ጋናው ዳንዳዬና።

---

\* 1:12 ኬፋ፡ ሃዌ ግሪኬ ሱንላ ጊዲዴ፡ ቢሌላይ ዛላ ጊያዋ፡ ሃራ ጌሻ ማፃፋቱዋን ኬፋ ሱንላይ ጳይሮሳ።

16 ቃሲ፡ ኤ፡ ኢስጻፋኖሳ ሶይ አሳካ ታኒ ፃማቃዲ። ሺን ሃራ ጉጃዴ ፃማቃዲ ታንቶኔ ዋዛና አሊኬ።

17 አዪሲ ጎፔ፡ ኪሪሰቶሲ ታና ሚሺራቹዋ ቃላ ኦዲና ማላ ኪቴዳፔ አቴን፡ ፃማቃና ማላ ኪቴቤና፤ ቃሲ ኪሪሰቶሲ ማሰቃሊያ ቦላ ሃይቄዳዌ ማላ ገዴና ማላ፡ ታኒ አሳ አዴዳ ኤራቴላ ቃላን ታማሪሲኬ።

**ኪሪሰቶሲ ያሳ አዴዳ ኤራቴላ ዋልቃ**

18 አዪሲ ጎፔ፡ ኪሪሰቶሲ ማሰቃሊያ ቦላ ሃይቄዳዋ ኦዲያ ቃላይ ጳዪያዋንቱሲ ኤያቴላ። ሺን ኮሲ አቴያዋንቱሲ ያሳ ዋልቃ።

19 ያሳ ማፃፋይ፡  
«ታኒ ኤራንቻቱዋ አዴዳ ኤራቴላ ባዪዛና፤  
ቃሲ አኬካንቻቱዋ አኬካካ ጳዪሳና»  
ያጌ።

20 አዴዳ ኤራንቻይ ሃቃን ዴዒ? ሂጊያ ታማሪሲያዌ ሃቃን ዴዒ? ዋይ ሃ አላሚያ ያናናው ፓሉሚቲያዋንቱ ዋናንዲኖሻ? ያሳይ ሃ ሳሳ አዶ ኤራቴላይ ኤያቴላ ገዲያዋ ቤሴዳ!

21 አዪሲ ጎፔ፡ አሳይ ባሬ ሁጳ አዶ ኤራቴላን ባሬና ያሳ ኤሬና ማላ፡ ያሳይ ባሬ አዶ ኤራቴላን ዲጊዴ፡ ኮኒ ኦዲያ ኤያ ቃላን አማኒያዋንታ አሻናው ቆፔዳ።

22 አዪሁዳቱ ማላታ ኦቹኖ። ቃሲ ገሪኬ አሳቱ አዶ ኤራቴላ ዋልቃማ ኮሻ ኮዪኖ።

23 ሺን ኮኒ ማሰቃሊያ ቦላ ሚሲማሪያን ጲሼቲዴ ካቄቲዳ ኪሪሰቶሳሳ ኦዴቶ። ሄዌ አዪሁዳቱዋሲ ጱቦ፤ ቃሲ አዪሁዳ ገዴናዋንቱሲ ኤያቴላ።

24 ሺን ያሳይ ያሴዳዋንቱሲ አዪሁዳቱሲካ ገሪካቱሲካ ኮኒ ኦዲያ ያሳ ዋልቃይኔ አ አዶ ኤራቴላይ ኪሪሰቶሳ።

25 አዪሲ ጎፔ፡ ያሳ ኤያቴላይ አሳ አዴዳ ኤራቴላፔ አዴ፤ ቃሲ አ ላፋቴላ ጌቴቲያዌካ አሳ ሚኖቴላፔ ሚኔ።

26 ሲሚ ታናዳን አማኒያዋንቶ፡ ያሳይ ሂንቴንታ ያሴያ ዋይ ሂንቴ ዋይሳ ማላ አሴንቶ ቆፒቴ። አሳ ቆፋን ሂንቴ ገደን አዶ ኤራንቻቱ፡ ዋልቃማቱኔ ቶቃ ሼሻቱ ዳራ ገዲኪኖ።

27 ሺን ያሳይ አዴዳ ኤራንቻቱዋ ዬላያናው፡ አላሚያን ዴዒያ ኤያቱዋ ደሬዳ፤ ቃሲ ሚናቱዋ ዬላያናው፡ አላሚያን ዴዒያ ላፋቱዋ ደሬዳ።

28 ያሳይ ሃ አላሚያን ዋለቃማባ ጊዳ ቆፒያዋ ቋዪሳናው። ሃ አላሚያ ማዳናባ ካዴቶባኔ ሃኒቤናባ ደሬዳ።

29 ሄዋ ዲራው። ኦኒኔ ያሳ ሲንላን ጨቁታናው ቤሴና።

30 ሺን ያሳይ ሂንቴንቴሲ ኪሪሰቶሲ ዩሱሳ ደዑዋ ኡዲ ኢሚዳ። ኪሪሰቶሲ ኩሲ አቶ ኤራቴላ፣ ደሎቴላ፣ ጌሻቴላኔ አቶቴላ ጊዳዳ።

31 ሄዋ ዲራው። ያሳ ማፃፋይ።

«ጨቁቴያ ኡራይ

ኦኒኔ ጎዳይ ኦሌዳዋን ጨቁቶ»

ያጌ።

## 2

### ኮኒ ኪሪሰቶሳ ካቃባ ማርካቴቶ

1 ታናዳን አማኒያዋንቶ፣ ታኒ ያሳ ቱማቴላ ፀራ \* ሂንቴንቴሲ ኦዳናው ሂንቴንቴኮ ዩዳ ዋዴ፣ ቶቃ ቃላኒኔ አዴዳ ኤራቴላን ኦዳናው ያቤይኬ።

2 አዪሲ ጎፔ፣ ታኒ ሂንቴንቴና ደዳዳ፣ ዩሱሲ ኪሪሰቶሳፔኔ ቃሲ ማሰቃሊያ ቦላ ሚሲማሪያን ቋሽቴዳ ኢ ካቁቴዳዋፔ አቴን፣ ሃራባ ኤሬናዳን፣ ታ ቆፋ ቃቻዳ።

3 ታኒ ዳቡራኒኔ ያሻን ዳር ኮኮርሳን ሂንቴንቴና ደዳዳ።

4 ታኒ ታማሪሲያዋኔ ኡዲያዋ ያሳ አያናኒኔ ዋለቃን ቆንጨሳይፔ አቴን፣ ጨማ ጊዲዳ አዴዳ ኤራቴላ ቃላና ጊዳና።

5 ሄዋ ዲራው። ሂንቴ አማኑ ያሳ ዋለቃናፔ አቴን፣ አሳ አቶ ኤራቴላን ዜሞፒቤና።

### ያሳ አዴዳ ኤራ

6 ኮኒ አያናን ዋዛናማቱዋ ጊደን አቶ ኤራቴላ ሃሳዬቶ። ሺን ሄዋካ ሃ አላሚያ አቶ ኤራቴላ ጊዳና፤ ዋይ ሃ አላሚያ ዋዲያ ቋዪያዋንቱ አቶ ኤራቴላ ጊዳና።

7 ሺን ኮኒ ኦዲያ አቶ ኤራቴላይ፣ ያሳይ ካሴቴዳ፣ ጮራ ዋዲያፔ ካሴ ኑ ቦንቹዋሲ ደሬዳ አሳፔ ጌሜዳ አ ፀራ አቶ ኤራቴላ።

8 ሃ አላሚያ ዋዲያዋንቱፔ ኦኒኔ ሃ አቶ ኤራቴላ ኤሪቤና። ኡንቴንቴ ኤራዳዋ ጊዲንቶ፣ ቦንቾ ጎዳ ማሰቃሊያ ቦላ ሚሲማሪያን ቋሽቴዳ ካቁኪና።

---

1:31 ኤርሞ 9:24 \* 2:1 ያሳ ቱማቴላ ፀራ፡ አቴ አቴ ጌሻ ማፃፋ ቢሉላቱ፣ ያሳባ ማርካቴላ፣ ያጊና።

9 ሺን ያሳ ማፃፋይ፡  
 «ኦኒኔ ኣይፊያን ቤዒቤናዌ፡  
 ሃይላንካ ሲሲቤናዌ፡  
 ቃሲ ኦኒኔ ባሬ ዎዛናን ቆፒቤናዌ  
 ያሳይ ባሬና ሲቂያዎንቱሲ ገገሴዳዎ»  
 ጊያዎዳን ኦኒ ሃሳዬቶ፡  
 10 ያሳይ ባሬ ፀራ ዬወዎ ባሬ ኣያናን ኦና ኤሪሴዳ፤ ኣዪሲ ጎፔ፡  
 ጌሻ ኣያናይ ያሳባ ሃራይ ኣቶ ጌሜዳ ዬወዎ ኡባ ቢዴ፡፡  
 11 ኣዪሲ ጎፔ፡ ኣሳን ዴዒያ ኣሳ ኣያናፔ ኣቲን፡ ኣሳባ ኤሪያዌ  
 ኦኔ? ሃዎዳንካ፡ ቃሲ ያሳባ ያሳ ኣያናፔ ኣቲን፡ ኦኒኔ ኤሪና፡፡  
 12 ኦኒ ያሳይ ኦሲ ኢሜዳባ ኡባ ኤሪናው ኢ ኦሲ ዬዴዳ ኣያና  
 ኣኩዴፔ ኣቲን፡ ኣላሚያ ኣያና ኣኪቤይኮ፡፡  
 13 ኦኒ ኣያና ዬወዎ † ኣያና ዬወዎና ጋሊዴ፡ ጌሻ ኣያናይ ኦና  
 ታማሪሴዳ ቃላን ሃዎ ሃሳዬቶፔ ኣቲን፡ ኣሳ ኣቶ ኤራቴላይ ኦና  
 ታማሪሴዳ ቃላን ሃሳዮኮ፡፡  
 14 ሺን ጌሻ ኣያናይ ባይና ኣሳይ ያሳ ኣያና ዬወዎ ኣኩና፤ ኣዪሲ  
 ጎፔ፡ ሄዌ ኣው ኤያቴላ፡፡ ዬወ ጌሻ ኣያናን ፓጩቲያ ዲራው፡ ኢ  
 ኤሪናው ዳንዳዬና፡፡  
 15 ሺን ጌሻ ኣያናይ ዴዒያ ኣሳይ ኡባባ ሻኬ፤ ሺን ኢ ባሬ  
 ሁጹው ኦናኒኔ ሻኬቴና፡፡  
 16 ኣዪሲ ጎፔ፡ ያሳ ማፃፋይ፡  
 «ጎዳ ዎዛና ኤሪያዌ ኦኔ?  
 ኢ ዘራናው ዳንዳዬያዌ ኦኔ?»  
 ያጌ፡፡ ሺን ኦሲ ኪሪሰቶሳ ዎዛናይ ዴዒ፡፡ †

### 3

#### ያሳ ካሊያዎንቱ ኣሱዎ

1 ታናዳን ኣማኒያዎንቶ፡ ታኒ ጌሻ ኣያናይ ዴዒያ ኣሳሲ  
 ሃሳዪያዎዳን፡ ሂንቴንቱሲ ሃሳያናው ዳንዳዬይኬ፡፡ ሺን ሃ  
 ኣላሚያ ኣሳሲ ሃሳዪያዎዳኒኔ ኣማኑዋን ሚኒቤና ኪሪሰቶሳን  
 ዴዒያ ጉላ ናና ማላ ኣሳሲ ሃሳዪያዎዳን ሃሳያዲ፡፡  
 2 ሂንቴንቱ ቢሮ ሚኖ ቁማ ማናው ዳንዳዬቤና ዲራው፡ ታኒ  
 ሂንቴንታ ማላ ፓካዲ፤ ሃራይ ኣቶ፡ ሃዒካ ዳንዳዬይኬኪታ፡፡

---

2:9 ኢሳ 64:4 † 2:13 ኣያና ዬወዎ፡ ጌሻ ኣያናይ ለሚዳ ቃላ፡፡ † 2:16  
 ኦሲ ኪሪሰቶሳ ዎዛናይ ዴዒ፡ ሃዎ ጉሳይ፡ ኦኒ ኪሪሰቶሲ ቆፒያዎዳን ቆፔቶ ጉሳ፡፡  
 2:16 ኢሳ 40:13

3 አዲሲ ጎፔ፣ ሂንቴ ሃዒካ ሃ አላሚያ አሳዳን ዳዒታ። ሂንቴንቱ ሃ አላሚያ አሳ ገዲያዎ ሂንቴ ገደን ዳዒያ ቃናቲኔ ፓሉማይ ኤሪሴኔ? ቃሲ ሃ አላሚያ አሳዳን ሲሜሬቲታ።

4 አዲሲ ጎፔ፣ ሂንቴንቱፔ ኢቱ፣ «ታኒ ጳዉሎሳዎ» ጎፔ፣ ሃሪይ ቃሲ፣ «ታኒ አጲሎሳዎ» ጎፔ፣ ሃ አላሚያ አሳ ማላ ገዲኪቱ?

5 ያቲና፣ አጲሎሲ ኦኔ? ጳዉሎሲ ኦኔ? ኮኒ ሂንቴንታ አማንሌዳ ያሳ ካሊያዎንታ። ያሳይ ኮሲ ሁጲያን ሁጲያን አሜዳ ኦሱዎ ኦሌቶ።

6 ታኒ ፑቲያ ቶካዲ፤ አጲሎሲ ሃላ ኡሼዳ፤ ሺን ያሳይ ፑቲያ ዲቹዳ።

7 ሄዎ ዲራው፣ ዲቹያ ያሳፔ ኣቲን፣ ቶኪያዌካ ሃላ ኡሺያዌካ አያኔ ገዳና።

8 ቶኪያዌኔ ሃላ ኡሺያዌ ኢቲ ማላ፤ ሺን ያሳይ ሁጲያን ሁጲያን አ ዳቡራ ኬና አው ዎይታና።

9 ኮኒ ያሳሲ ኢቲፔ ኦሌያ አ ኦሳንቻቱዎ ገዲያ ዲራው፣ ሂንቴ አ ኦሱዎ ሳዓ።

ቃሲካ ሂንቴ ያሳ ጎሊያ።

10 ያሳይ ታው አሜዳ አጼ ኬካቲላን ኤሪንቻ አናዲያዳን፣ ጎሊያ ባሱዎ ባሳዲ። ሃራ ኡራይ አ ቦላ ኬፄ። ሺን አ ቦላ ኬፄያ ኦኒኔ ዎቲ ኬፄንቶ፣ ባሬ ሁጲው ናጌቶ።

11 አዲሲ ጎፔ፣ ያሳይ ዩሱሲ ኪሪሰቶሳ ፃላላ ባሶ ኦሌዳ ዎሌዳ። አፔ ሃራ ባሱዎ ባሳናው ኦኒኔ ዳንዳዬና።

12 ሺን ሃ ባሱዎ ቦላ ኦኒኔ ዎርቃን ገዲና፣ ቢራን ገዲና፣ አልያ ሹቻን ገዲና፣ ሚላን ገዲና፣ ጋታን ዎይ ማቃን ኬፆፔ።

13 አሳ ኡባ ኦሱ ቆንጨያ ኬሳናዎ። አዲሲ ጎፔ፣ ታማን ቆንጨና ዲራው፣ ሄ ጋሳሳይ አሳ ኡባ ኦሱዎ ቤሳና። አሳይ ኡባይ ባሬ ኦሱዎ ዎቲ ኦሌዳንቶኔ ታማይ ፓጫና።

14 ኦኒኔ ባሱዎ ቦላ ኬፄዳ ኦሱ ሚኒዳ አቶፔ፣ ኢ ዎይታ አካናዎ።

15 ኦ ኦሱኔ ጉዳቶፔ፣ ሄ ኡራይ ቆሄታና። ኢ ባሬ ሁጲው አታና፤ ሺን ታማ ገደፔ ኬሲ አኮዋዳን አታና።

16 ሂንቴንቱ ያሳይ አቋያ ጌሻ ጎሊያ ገዲያዎኔ ያሳ አያናይ ሂንቴንቱን ዳዒያዎ ኤሪኪቱ?

17 ኦኒኔ ያሳ ጌሻ ጎሊያ ኮሎፔ፣ ያሳይ አ ኮላና። አዲሲ ጎፔ፣ ያሳይ አቋያ ጌሻ ጎሊ ጌሻ፤ ሄ ጌሻ ጎሊካ ሂንቴንታ።

18 ኦሪኔ ባሬ ሁጲያ ጨዋፖ። ሂንቴንቴፔ ኦሪኔ ባሬና ሃ አላሚያን አቶ ኤራንቻ ያጊዴ ቆፖፔ፣ አቶ ኤራንቻ ጊዳናው፣ ኤያ ጊድ።

19 አዪሲ ጎፔ፣ ሃ አላሚያ አቶ ኤራቴላይ ያሳ ሲንላን ኤያቴላ። ያሳ ማፃፋይ፣

«ያሳይ አቶ ኤራንቻቴዋ ኤንቴንታ ኤንቴንቴ ጌኒያን ኦይቄ»

ያጌ።

20 ቃሲ፣

«አቆዳ ኤራንቻቴዋ ቆፋይካ ማዲ ባይናዋ ጊዲያዋ ጎዳይ ኤሬ»

ያጌ።

21 ሄዋ ዲራው፣ ኦሪኔ አሳን ጨቄቶፖ። አዪሲ ጎፔ፣ ኡባባይካ ሂንቴዋ።

22 ጳውሎሲካ፣ አጲሎሲካ፣ ኬፋይካ፣ \* ሃ አላሚካ፣ ዴቦካ፣ ሃይቆካ፣ ሃዲ ዴዲያዌካ፣ ሲንላፔ ያናዌክ፣ ኡባይካ ሂንቴዋ።

23 ሂንቴንቴ ኪሪሰቶሳዋንታ፣ ኪሪሰቶሲካ ያሳዋ።

# 4

## ኪሪሰቶሳ ካሊያዋንታ

1 አሳይ ኑና ኪሪሰቶሳው ኦሊያዋንቴዲኒ ያሳ ጎሌን ዴዲያ ፀራ ናጊያ አሳዳን ቆፖ።

2 ያቴዴ ሄ አሳቴ ባሬንቴ ጎዳሲ አማኔቴዳዋንታ ጊዲዴ፣ ቤታናው ኮሹ።

3 ሺን ሂንቴ ዋይ ሃራይ ታ ቦላ ፐርዶፔ፣ አይኔ ጊዴና። ሃራይ አቶ፣ ታኒካ ታ ሁጲያን ፐርዲኬ።

4 አዪሲ ጎፔ፣ ታኒ ታ ሁጲያን አያኔካ ኤሪያባይ ባዋ፣ ሺን ታና ሄዌ ዲሊሴና። ታና ፐርዲያዌ ጎዳ።

5 ሄዋ ዲራው፣ ጎዳይ ጳማኒ ጌሜዳባ ፖፐዋ ኬሲያዌ፣ ዋዛና ቆፋ ቆንጨሲያዌ ያና ዋዲ ጋካናሲ ኦ ቦላኒኔ ኦናኔ ፐርዶፔ፣ ሄ ዋዴ፣ አሳይ ኡባይ ሁጲያን ሁጲያን ያሳፔ ሳባ ዴማናዋ።

6 ታናዳን አማኒያዋንቶ፣ ሂንቴንቴፔ ኦሪኔ ኢቱ ታማሪሲያዋ ሳቢዴ፣ ሃራይ ታማሪሲያዋ ቦሬና ማላ፣ «ያሳ ማፃፋን ፃፊቴዳዋ ቦንቻ» ያጊያዋ ሂንቴ ኑናና ታማራና ማላ፣ ሂንቴ ዲራው፣ ታባኔ አጲሎሳባ ለሚሱዋዳን ኦዳዲ።

3:19 ዮብ 5:13    3:20 ማዝ 94:11    \* 3:22 ኬፋ፡ 1:12 ሃ ሱንላው ፃፊቴዳ ቢሌላና ኢቱዋ።

7 አዲሱ ጎፎ፣ ሃራቱዋፔ ኔና ኦኔ ቶቂሴዳዌ? ኔኒ ያሳፔ አካቤናባይ ኔው አዬ ዴዒያዌ? ያተና፣ ኔኒ አኬዳዋ ጊደፔ፣ አዲሱ አካቤናዋዳን ጨቁታይ?

8 ሃዒ ሂንቴ ካሌዲታ። ሃዒ ዲሬቴዲታ። ኦኒ ባይናን ሂንቴሬካ ካዉቴዲታ። ኦኒካ ሂንቴንቴና ካዉታናዳን፣ ሂንቴ ካዉቴዲቴንቶ ሎዓ ሺን።

9 አዲሱ ጎፎ፣ ታው ማላቲያዋዳን፣ ኦኒ ሃ ሳዓሲ፣ ከታንቻቱዋሲኔ አሳሲ ካሳ ጊዴዳ ዲራው፣ ያሳይ ኦና ዬሱሲ ከቲዳዋንታ ሃይቁዋሲ ፐርዴቴዳ አሳዳን፣ ኡባፔ ወርሴላ ኦሌዳ።

10 ኦኒ ኪሪሰቶሳ ዲራው ኤያ፣ ሺን ሂንቴ ኪሪሰቶሳን አዴዳ ኤራንቻ። ኦኒ ዳቡራንቻ፣ ሺን ሂንቴ ሚና። ሂንቴንቴ ቦንቹቴዳዋንታ፣ ሺን ኦኒ ቶሼቴዳዋንታ።

11 ሃ ዋዲ ጋካናሲ፣ ኦኒ ኮሻቴቶ፤ ሳሜቴቶ፤ ካሎቴቶ፤ ዴሼቴቶ። ቃሲ ዴዒያ ሳዓ ቶዴዳ ዩዬቶ።

12 ኦኒ ኦ ኩሺያን ኦሌዳ ዳቡራቶ። ኦና አሳይ ሼቂያ ዋዴ፣ አንጃቶ። ኦና ዬዴርሲ ዩዩያ ዋዴካ ዳንዳዬቶ።

13 ኦ ቦላ ኢታባ ሃሳዩያ ዋዴ፣ ኦኒ ሎዎ ቃላ ዛሬቶ። ኦኒ ሃዋ ጋካናሲካ፣ ሃ ሳዓ ፒቱዋኔ ኡባባ ቡራ ጊደዳ።

14 ታኒ ታ ሲቂያ ናናዳን፣ ሂንቴንታ ሴራናው ሃዋ ዓፋዲፔ አቲን፣ ዬላያናው ዓፋቤይኬ።

15 አዲሱ ጎፎ፣ ኪሪሰቶሳን ሂንቴንታ ዲቺያ ታው ሻዓ አሳይ ሂንቴንቴሲ ዴያፔካ፣ ሂንቴንቴሲ አቲ አዉዋፔ ሃራይ ባዋ። አዲሱ ጎፎ፣ ታኒ ሚሺራቹዋ ቃላ ሂንቴንቴሲ አሄዳዋዳን፣ ኪሪሰቶሳ ዬሱሳን ሂንቴንቴሲ አዉዋ ጊዳዲ።

16 ሲሚ ታናዳን ሃኒቴ ያጋዴ ሂንቴንታ ዋሳይ።

17 ሃዋ ዲራው፣ ጎዳን አማኔቴዳ ታ ሲቂያ ታ ናዓ ዪዋቶሳ ሂንቴንቴኮ ከታዲ። ኢ ኡባ ሳዓን ዴዒያ አማኒያ አሳ ኡባው ታኒ ታማሪሲያ ኪሪሰቶሳ ዬሱሳን ዴዒያ ታ ኦጊያ ሂንቴንታ ሃሳዩሳናዋ።

18 ታኒ ሂንቴንታ ቤዓናው ሂንቴንቴኮ ዬናባ ማላቲና፣ ኦቶሬቴያ አቲ አቲ አሳቱ ዴዒና።

19 ሺን ጎዳይ ጎፎ፣ ታኒ ሂንቴንቴኮ ኤሌካ ባዴ ሄ ኦቶሬቴያ አሳቱዋሲ ሃሳያ ጊዴናን፣ ኡንቴንቴ ዋልቃ ኤራና።

20 አዲሱ ጎፎ፣ ያሳ ካዉቴላይ ያሳ ዋልቃናፔ አቲን፣ ሃሳያና ጊዴና።

21 ታኒ ሂንቴንቴኮ ሙሪያ ዓምዓና ዮዬ ዋይ ሲቁዋናኔ አሺኬ አያናና ዮ? ሃቃዋ ደሪቴ?



# 5

## አማኒያ እሳ ጊደን አሴቲዳ ፖኮባ

1 ሂንቴንቲ ጊደን ፖኮ ዋሹማ ኦሱ ዳዒያዊ ዘገሬቲ፤ ሄዋ ማላ ፖኮ ዋሹማ ኦሱ ሃራይ አቶ፣ ያሳ አማኔና እሳ ጊደኒኔ ባዋ። አዪሲ ጎፔ፣ ባሬ አዉዋ ማቻቶ አኬዳ እሳይ ዳዔ።

2 ሂንቴንቲካ ኦቶሬቲዲታ። ሄዋፔ ሂንቴ ካዮታናው ቤሴኔ? ሄዋ ማላ ፖኮ ኦሱዋ አጭዳ ቢታኒ ሂንቴ ጊደፔ ኪቻናው ቤሴ።

3-4 እያ ጊደናካ ታኒ ታ እሳቲላን ሂንቴንቲና ዳዔናኒ ቆየፔካ፣ አያናን ሂንቴንቲና ዳዔይ። ሃዒ ሂንቴንቲና ዳዒያዋዳን ሃናይ፣ ሄዋ ማላ ኦሱዋ አጭዳ ቢታኒያ ቦላ ኑ ጎዳ ዩሱሲ ኪሪሰቶሳ ሱንላን ፐርዳዲጋዲ። ሂንቴንቲኔ ታ አያናይ ኑ ጎዳ ዩሱሲ ኪሪሰቶሳ ዋልቃና ኢቲፔ ሸቂዳ።

5 ሄ ቢታኒያ አያናይ ጎዳ ዩሱሲ ፐርዳው ዪያ ጋላሳን አታና ማላ፣ ናጋራን ኩሜዳ አ ቦላ ኮላናዳን ሴፃናሲ ሂንቴ አማናዳን፣ ታኒ ፐርዳዲ።

6 ሂንቴንቲ ጩቁ ሎዓ ጊደና። ጉላ ኢርሹ ሙናቃ ኡባ ዴንሲያዋ ኤሪሲቲ?

7 ሂንቴንቲ ኦራላ ጊደና ማላ፣ ናጋራ ኢርሹ ጫሌዳዋ ኬሲቲ። ሂንቴንቲ ኢርሹ ባይና ሙናቃ ማላ። አዪሲ ጎፔ፣ ኑ ፓሲጋ ደርሳይ፣ ኪሪሰቶሲ ያርሹቲዳ።

8 ሄዋ ዲራው፣ ኮኒ ኡኪላ ባላ ሱሬቲላኒኔ ቲማቲላን ቦንቻናፔ ኢቲን፣ ጫላ ኢርሹዋን፣ ኢታቲላ ኢርሹዋንኒ ጌላቲላ ኢርሹዋን ቦንቻኮ።

9 ዋሹማናው ቆፒያዋንቲና ሂንቴ ኢቲፔ ጋኬቲና ማላ፣ ሂንቴንቲሲ ዳቢዳቢያ ፃፋዲ። \*

10 ታኒ ጊያዌ ሃ አላሚያን ዳዒያ ዋሹማናው ቆፒያዋንቲፔ ዋይ ዮራቲያዋንቲፔ፣ ካዪሶቲያዋንቲፔኔ ዋይ ኤቃው ጎዪኒያዋንቲፔ ኡባካ ሻኬታና ማላ ጊደና። ሄዋ ጊደፔ፣ ሃ አላሚያፔ ሂንቴ ሻኬቲ ባናው ቤሴ ጉሳ።

11 ሺን ኢሻቲዋ ሃዒ ጌቲቲያዋንቲፔ ኢቲኔ ዋሹማናው ቆፒያዋንቲ ዋይ ሚሻው ዮራቲያዋንቲ ዋይ ኤቃው ጎዪኒያዋንቲ ዋይ እሳ ሱንላ ባይዚያዋንቲ ዋይ ማላቲያዋንቲ ዋይ

---

5:1 ዛር 22:30    5:7 ኬሰ 12:5    5:8 ኬሰ 13:7፤ ዛር 16:3    \* 5:9 ዳቢዳቢያ ፃፋዲ፣ ሃዋ ፃፋናፔ ካሴና ጳውሎሲ ቆሮንቶሳ እሳሲ ፃፊዳ ሃራ ቆንጨያን ኤሬቲቤና ዳቢዳቢ ዳዔ ጉሳ።

ወዲያዎንቱና ሂንቴንቱ ኢትፔቴላ ኦፊና ማላ፡ ታኒ ሂንቴንቱሲ ፃፋዲ። ሄዎንቱ ማላና ሃራይ ኦቶ፡ ቁማካ ኢትፔ ሞፒቴ።

12 አዩሲ ጎፔ፡ ዎሳ ጎሌፔ ካሬና ደዲያዎንቱ ቦላ ፒርዳናው ታና አዬ ጋሊ? ሂንቴንቱ ጊደን ዎሳ ጎሌን ደዲያዎንቱ ቦላን ሂንቴ ፒርዲኪቴዬ?

13 ሺን ካሬና ደዲያዎንቱ ቦላን ፆሳይ ፒርዳና። ሄ ኢታባ ኦሊያ ኡራ ሂንቴ ጊደፔ ኬሲዲጊቴ።

# 6

አማኒያ አሳ ጊደን ደዲያ ዎላሳ ዎቲዴ ቆዩሳናው ቤሲ?

1 ሂንቴንቱፔ ኢት ኡራሲ ባሬ ኢሻና ሞቱ ደዲያባ ጊደፔ፡ አማኒያዎንቱ ቦላ ፒርዴታናዎ ባሺዴ፡ አማኔናዎንቱ ቦላ ፒርዴታናው ዎኒ ፃሊዴ ቤ?

2 አማኒያዎንቱ አላሚያ ቦላ ፒርዳናዎ ኤሪኪቴ? ያቲና፡ አላሚያ ቦላ ሂንቴ ፒርዳናዎንታ ጊደፔ፡ ኡባባፔ ጉዲያዎ ፒርዳናው ዳንዳይኪቴ?

3 ሃ ደዑባባይ አቶ ሺን፡ አማኒያዎንቱ ኪታንቻቱዎ ቦላ ፒርዳናዎ ኤሪኪቴ?

4 ያቲና፡ ሂንቴንታ ሃ አላሚያ ደዑባባው ፒርዳ ጎሌ ቡሳይ ኮሾፔ፡ አማኒያ አሳይ ካዴዳ አሳን ፒርዲሳናው አፊቴ?

5 ታኒ ሂንቴንታ ዬላያናው ሃዎ ጋይ፤ ሃዎ ጊዳናው ቤሲ? ሂንቴንቱ ጊደን ኢሻቱዎ ሲጌላናው ዳንዳይዬ ሎዎ ኤራንቻ አሳይ ኢቱኔ ባዌ?

6 ሺን ኢት ኢሻይ ዮኮ ኢሻ ፒርዳ ጎሌን ሞቲዴ፡ ሄ ዬወዎ አማኔና አሳን ፒርዲሲ?

7 ሲሚ ኢቱ ኢቱዎ ሞቲያዌ ሂንቴ ጊደን ደዎፔ፡ ሄዌ ሂንቴ ኩንዴዳዎ ቤሲ። ሄዎፔ ሂንቴ ናቄቲያዌኔ ጨሚቲያዌ ሎዴኔ?

8 ሺን ሂንቴ ሂንቴ ሁጹው ኢቱ ኢቱዎ ሃራይ ኦቶ፡ ሂንቴ ኢሻቱዎካ ናቄታኔ ጨሚታ።

9 ዎይ ማካላንቻቱ ዎሳ ካወቱላ ላቲናዎ ኤሪኪቴ? ባሎፒቴ። ዎሹማናው ቆፒያዎንቱ ዎይ ኤቃው ጎዩኒያዎንቱ ዎይ ዎሹሚያዎንቱ ዎይ አቱማዎ ጊዲዴ፡ አቱማዎና ጊሲያዎንቱ።

10 ዎይ ካዩሳቱ ዎይ ሚሻው ዮራቲያዎንቱ ዎይ ማላቲያዎንቱ ዎይ አሳ ሱንላ ባይዚያዎንቱ ዎይ ቦንቁያዎንቱ ዎሳ ካወቱላ ላቲኪኖ።

---

5:13 ዛር 13:5፤ 17:7

11 ሂንቴንቴፔካ ኢቲ ኢቲ አሳይ ሄዋንቴ ማላ። ሺን ጎዳ ዩሱሲ ኪሪሰቶሳ ሱንጎሊኔ ኑ ያሳ አያናን ሂንቴ ሜጩቴዴ ጌዬዲታ፤ ቃሲ ዪሌዲታ።

**ሂንቴንቴ አሳቴላ ያሳ ቦንቹዋሲ ፔሺቴ**

12 ኢቲ ኡራይ፡ «ታኒ ኮዬዳባ ኡባ ኦላናው ዳንዲያይ» ጋና ዳንዳይ። ሺን ኡባይካ ታና ማዴና። ታኒ ኮዬዳባ ኡባ ኦላናው ዳንዳያይ። ሺን አዩኔካ ታና ሞዴና።

13 ቃይ ሃራይካ፡ «ቁማይ ኡሉዋሳ፤ ኡሉካ ቁማሳ» ጌ። ሺን ያሳይ ኡሉዋካ ቁማካ ቆዩሳና። አሳ አሳቴላይ ጎዳ ዩሱሳሳፔ ኣቲን፡ ዋሹማሳ ገዴና። ጎዳ ዩሱሲካ አሳ አሳቴላሳ።

14 ያሳይ ጎዳ ዩሱሳሳ ሃይቁዋፔ ዴንሌዳ፤ ቃሲ ኑናካ ሃይቁዋፔ ባሬ ዋልቃን ዴንላና።

15 ሂንቴንቴ አሳቴላይ ኪሪሰቶሳ አሳቴላና ኢቱዋ ገዲያዎ ሂንቴ ኤሪኪቴ? ያቲና፡ ታኒ ኪሪሰቶሳ አሳቴላና ኢቱዋ ገዴዳዎ አፋዴ፡ ጩራቲ አሳቴላና ኢቱዋ ኦላናው ቤሲ? ቤሴና!

16 ዋይ ጩራቲና ኢቲፔቴላ ሜጲያ ኡራይ ኢዚና ኢቲ አሳቴላ ገዲያዎ ኤሪኪቴ? አዩሲ ጎፔ፡ ያሳ ማፃፋይ፡ «ኡንቴንቴ ላባቴ ኢቲ አሻ ገዲና» ያጌ።

17 ሺን ጎዳና ኢቲፔቴላ ሜጲያ ኡራይ አያናን አናና ኢቱዋ ገዴ።

18 ዋሹማፔ ሃኪቴ። ኢቲ ኡራይ ኦሊያ ሃራ ናጋራ ኡባይ ኣ አሳቴላፔ ካሬና ዴዴ፤ ሺን ዋሹሚያዌ ባሬ ቦላን ናጋራ ኦሉ።

19 ዋይ ሂንቴ ቦላይ ያሳይ ሂንቴንቴሲ ኢሜዳ ሂንቴንቴን ዴዴያ ጌሻ አያናይ ኣቁያ ጌሻ ጎሊያ ገዲያዎ ኤሪኪቴ? ቃሲ ሂንቴ ሂንቴ ሁጲያሳ ገዲኪታ።

20 አዩሲ ጎፔ፡ ያሳይ ሂንቴንጋ ጋቲያን ሻሜዳ። ሄዋ ዲራው፡ ሂንቴ አሳቴላን ኣ ቦንቹቴ።

**7**

**ጌሉዋ ኣካባሲ ኦሼቴዳ ኦሻኔ ኢሜቴዳ ዛሩዋ**

1 ሂንቴንቴ ታው ፃፌዳ ዩወዋሲ አቱማ አሳይ ማጫወኖ ቦቹኔንቶ ሎዳ።

2 ሺን ዋሹማ ጋሱዋ ዲራው፡ አቱማ አሳሲ ሁጲያን ሁጲያን ማቻታ ዴዴ። ቃሲ ማጫ አሳሲካ ሁጲያን ሁጲያን አሲናይ ዴዶ።

3 አሲናይ ባሬ ማቻቲው አሲናቴላን ቤሲያባ ኡዶ፤ ቃሲ ሄዋዳን፡ ማቻታካ ባሬ አሲናሲ ማቹቴላን ቤሲያባ ኦሉ።

4 ማቻታ ባሬ አሳቴላሲ ጎዳ ጊዳኩ፤ ሺን ኢዚ አሲናይ ጎዳ። ሃዋዳንካ፣ ቃሲ አሲናይ ባሬ አሳቴላሲ ጎዳ ጊዳና፤ ሺን አ ማቻታ ጎዳ።

5 ሂንቴንቱ ሂንቴ ጊዳን ያሳ ዋሳን ገንጫናው ሄ ዋዲያሲ ዘሬታን ዲጌታና፤ ኢቱ ኢቱዋ ዲጎፒቱ። ሂንቴንቱ ሂንቴንታ ናገና ዲራው፣ ሴፃናይ ሂንቴንታ ፓጩናዳን፣ ኢቲ፤ ዳዒቱ።

6 ሺን ታኒ ሂንቴንታ ሄዋ ሂንቴ ደሶዋዳን ሃኒቱ ጋዩ፤ ኢቲን፣ አዛዚኩ።

7 ታኒ አሳይ ኡባይ ታናዳን ሃኒንቶ ደሳይ። ሺን ያሳይ አሳው ሀጺያን ሀጺያን ዲማ ዲማ አሞታ አሚ ዋሌዳ፤ ኢቱዋሲ ሃዋዳን፣ ቃሲ ዮኮዋሲ ሄዋዳን አሚ ዋሌዳ።

8 ሄዋ ዲራው፣ ታኒ ማቻቶ አኪቤናዋንቱኔ አሲናይ ሃይቆ ማጫዋንቱ ታናዳን ጮ ዳዒ፣ ኡንቱንቶ ሎፃ ጋይ።

9 ሺን አሙዋን ጉዳቲያዋ፤ አኪያዌኔ ጌሊያዌ ሎፃ ጊዲያ ዲራው፣ ኡንቱንቱ ባሬንታ ናጋናው ዳንዲያና ጳዮ፤ አኪና፤ ጌሊኖ።

10-11 ማቻታ ባሬ አሲና፤ ሻኬቱ። ሺን ሻኬቶ፤ ጌሌናን ዳዒ፤ ዋይ ባሬ አሲናና ሲጌቱ። አሲናይካ ባሬ ማቻቶ ዩዶ፣ ያጋዳ፣ አኬዳዋንታኔ ጌሌዳዋንታ አዛዛይ። ሺን ሃዋ አዛዚያዌ ጎዳ፤ ኢቲን፣ ታና ጊዲኩ።

12 ታኒ ሃራቱዋ ሃዋዳን ጋይ፤ ጎዳ ጊዳና። አማኔና ማቻታ ዳዒያ አማኒያ አሳይ ኦኒኔ ዳዖ፤ አ ማቻታ አናና ኢቲ፤ ዳዒያዋ ኢ ደሶ፤ ኢዘ ዩዶ።

13 ቃሲ አማኔና አሲናይ ዳዒያ አማኒያ ማቻታ ዳዖ፤ ኢዚ አሲናይ ኢዚና ኢቲ፤ ዳዒያዋ ኢዘ ደሶ፤ አ፤ ሻኬቱ።

14 አዩሲ ጎ፤ አማኔና አሲናይ ባሬ አማኒያ ማቻቲና ዳዒዳ ጌዩዳ። ቃሲ አማኔና ማቻታ ባሬ አማኒያ አሲናና ዳዒዳ ጌያዳ። ሄዌ ባዌንቶ፣ ሂንቴንቱ ናናይ ቱና፤ ሺን ሃዒ ኡንቱንቱ ጌሻ።

15 ሺን አማኔናዌ ሻኬታና ኮዮ፤ ሻኬቶ። አማኒያ ማቻቶ ጊዲና፣ ዋይ አሲና ጊዲና፣ ሃዋ ማላ ዩዌዋን ቃሼቲኪኖ። አዩሲ ጎ፤ ያሳይ ኦና ሳርቲላን ዳዒናው ያሴዳ።

16 አማኒያ ማቻቱ፣ ኔኒ ኔ አሲና አሻኒንቶኔ ኦ ኤሪ? ዋይ አማኒያ አሲናው ኔኒ ኔ ማቻቶ አሻኒንቶኔ ኦ ኤሪ?

ያሳይ ሂንቴንታ ኮይር ያሲያ ዋዳ ሂንቴንቱ ዳዒያ ሃናታን ዳዒቲ

17 ጊደፔኑ፣ አሳይ ሁጲያን ሁጲያን ጎዳይ አው ኢሜዳዋዲኔ ቃሲ ያሳይ ባሬና ጄሴዳዋዲን ዴዎ። ሄዌ አማኒያ አሳ ኡባ ታኒ ታማሪሴዳ ሂጊያ።

18 ኦኒኔ ቃፃሬቲ ኡቲዴ፣ ያሳ አማኔዳዋ ጊደፔ፣ ባሬ ቃፃሬ ማላ ዲጎፖ። ቃሲ ኦኒኔ ቃፃሬቲናን ዴዒዴ፣ ያሳ አማኔዳዋ ጊደፔ ቃፃሬቶፖ።

19 አዪሲ ጎፔ፣ ያሳ አዛዙዋ ናጋናፔ ኦቲን፣ ቃፃሬቲና ቃፃሬታና ጳዪና አላሊ ባዋ።

20 አሳይ ሁጲያን ሁጲያን ያሳይ ባሬና ጄሴያ ዎዴ ዴዒያዋዲን ዴዎ።

21 ያሳይ ኔና ጄሴያ ዎዴ ኔኒ አይሌ? አይኔ ባዋ፤ ሺን ኔኒ አይሌቲላፔ ኬሳናው ዳንዳዮፔ ኬሳ።

22 አዪሲ ጎፔ፣ አይሌ ጊዲ ኡቲዳ አሳ ጎዳይ ጄሶፔ፣ ኢ ጎዳይ አይሌቲላፔ ኬሴዳ አሳ። ሃዋዲንካ፣ አይሌ ጊዴና አሳ ኪሪሰቶሲ ጄሶፔ፣ ኢ ኪሪሰቶሳ አይሌ።

23 ያሳይ ሂንቴንታ ጋቲያን ሻሚዳ። አሳ አይሌ ጊደፔ።

24 ታናዲን አማኒያዋንቶ፣ አሳይ ሁጲያን ሁጲያን ያሳይ አ ጄሴያ ዎዴ ዴዒያ ዴዑዋዲን፣ ያሳና ዴዎ።

**ጌሌቲ አኩቲቤናዋንቱባኔ አምዒቱዋባሲ አሺቲዳ አሻ**

25 ዎድራቱዋሲ ጎዳይ ታና አዛዜዳባይ ባዋ። ሺን ታኒ ጎዳሲ አማኔቲዳዋ ጊዴዳ ዲራው፣ አፔ ማሮቲላ አኩዳዋዲን፣ ሂንቴንታ ዘራይ።

26 ሲሚ ሃዒ ሜቱዋሲ ታው ሃዌ ሎዓ ማላቲ፤ አሳይ ሃዋዲን ሃኒዴ ዴዎፔ ሎዓ።

27 ኔኒ ማቻቶ አካዲጌዳዋ ጊደፔ፣ ኢዞ ዬዳናው ኮዮፓ። ማቻቶ አካቤናዋ ጊደፔ፣ አካናው ኮዮፓ።

28 ሺን ኔኒ ማቻቶ አኮፔ፣ ናጋራ አላቤይካ። ዎድራታካ አሲና ጌሎፔ፣ ናጋራ አላቤይኩ። ሺን አኩቲያዋንቶኔ ጌሌቲያዋንቶ ኡንቲንቱ ዴዑዋን ዎልቃማ ሜቱ ዴዒ። ታኒ ሂንቴንታ ሄ ሜቱዋፔ አሻናው ኮያይ።

29 ሺን ታናዲን አማኒያዋንቶ፣ ታኒ ጊያዌ ሃዋ፤ ዎዲ ዉሬዳ። ሃዋፔ ሲንላው አኩዳ አሳቱ፣ አኪቤና አሳዲን ሃኒና።

30 ዬኪያዋንቱ ዬኪናዋዲን፣ ናሼቲያዋንቱ ናሼቲናዋዲን፣ ሻሚያዋንቱካ ሻሚዴ አይኔ ባይናዋዲን፣

31 ሃ አላሚያ ዴዑዋን ማዴቲያዋንቱ ኡባካ ማዴቲናዋዲን ሃኒና። አዪሲ ጎፔ፣ ሃ አላሚያ ዴዑ አቲያዋ።

32 ሂንቴንቱ ሂርጌናን ዴዓናዋ ታኒ ዶሳይ። አኪቤናዌ ጎዳ ናሼቻናው ኮዪያ ዲራው፣ አ ኦሱዋባ ቆፔ።

33 ሺን አኩዳዊ ባሬ ማቻቶ ናሼቻናው ኮዪያ ዲራው፣ ሳባባ ቆፔ።

34 አ ቆፋይ ሻኬቴዳ። አሲና ጌላቤና ዎዶራታ ባሬ አሹዋኒኔ ባሬ ሸምጥዋን ጌያናው ኮዪያ ዲራው፣ ጎዳ ኦሱዋባ ቆፓው። ሺን አሲና ጌሌዳውና ባሬ አሲና ናሼቻናው ኮዪያ ዲራው፣ ሳባባ ቆፓው።

35 ታኒ ሃዋ ሂንቴንታ ማዳና ማላ ጋዪፔ አቲን፣ ሂንቴንታ ዲባናው ጊኬ። ሺን ሂንቴ ቤሲያዋዳን ዳዒዳ፣ ጎዳ ኦሱዋ ሂንቴና ኢሚዳ ኦፋና ማላ ኮያይ።

36 ኦኒኔ ባሬ ጊጊሴዳ ዎዶራቶ አኪያ ዎዲ ጋኪና፣ ባሬና ናጋናው አው ዳንዳዬቴናን ኢፆፔ፣ ኢዞ አኮ። ኢ ኢዞ አኮፔ፣ ሄዋን ናጋራይ ባዋ።

37 ሺን ኢ ባሬ ዎዛናን ሚኖፔ፣ አኬናን ጋሚዳና ዳንዳዬ። ቃሲ ባሬና ናጊዳ፣ ባሬ ጊጊሴዳ ዎዶራቶ አኬናን ጋሚዳና ጎፔ፣ ኦኒኔ ዎልቃንሴናን ባሬ ዎዛናን ቆፋ ቃቹዳዋ ጊዶፔ ሎይሴዳ።

38 ሄዋ ዲራው፣ ዎዶራቶ አኪያ ኦራይ ሎይሴዳ፤ ቃሲ አኬናዌ ኡባ አሲ ሎይሴዳ።

39 አሲና ጌሌዳ ሚሺራታ ባሬ አሲናይ ዳዔዳ ኬናን አናና ኢቴፔ ዳባናዳን ቃሼታ ኡታዲ። ሺን ኢ ሃይቆፔ፣ ጎዳ አማኒያ አሳ አናኔ ጊዶፔ፣ ባሬ ዶሴዳ አሲና ጌላናው ዳንዳያው።

40 ታ ቆፋ ጊዶፔ፣ ጌሌናን ዳባንቶ፣ ኢዞ ናሼቻን ዳባና። ቃሲ ታናን ያሳ አያናይ ዳዒያዋ ታኒ ኤራይ።

# 8

## ኤቃሲ ያርሼቴዳ ቁማባ

1 ኤቃሲ ያርሼዳ ቁማባ ጊዶፔ፣ ኑኒ ኡባይካ ኤራቶ። ኤራይ ኦቶርሴ፤ ሺን ሲቁ አማኑዋን ዲቼ።

2 ኦኒኔ ባሬው ኢቲባ ኤሪያዋ ማላቶፔ፣ ኢ ቢር ኤራናው ቤሲያዋ ኤሪቤና።

3 ሺን ኦኒኔ ያሳ ሲቆፔ፣ ያሳይ አ ኤሬ።

4 ሄዋ ዲራው፣ ኤቃው ያርሼዳ ቁማ ሙሳባ ጊዶፔ፣ ኤቃ ኡባይ አላሚያን አያኔ ጊዳናዋኔ፣ ኢቲ ያሳፔ አቲን፣ ሃራይ ባይናዋ ኑኒ ኤራቶ።

5 አዪሲ ጎፔ፣ ጮራ ያሳቱኔ ጮራ ጎዳቱ ዳዒኖ። ሺን ሃራይ አቶ፣ ሳሉዋን ጊዲና ሳባን ጊዲና፣ ያሳቱዋ ጌቴቲያዋንቱ ዳፆፔካ፣

6 ኡባባ ሜዴዳዌ ኑኒ አው ዲዲያዌ፣ ኢቲ ያሳይ፣ አው፣ ኑሲ ዴዴ። ቃሲ ኡባባይ ኣኒ ሜዴቴዳዌኔ ኑኒ ኣኒ ዲዲያዌ ኢቲ ጎዳይ፣ ዩሱሲ ኪሪሰቶሲካ ኑሲ ዴዴ።

7 ሺን ሃ ኤራይ ኣሳ ኡባው ዴዴ። ኢቲ ኢቲ ኣሳቱ ኤቃ ደዴዳ ዲራው፣ ሃዲ ጋካናዉካ፣ «ኤቃው ያርሼዳ ቁማ» ያጊዴ ሚኖ። ቃሲ ኡንቱንቱ ዋዛናይ ሹጋ ጊዴዳዋን፣ ኡንቱንቶ ሃ ቁማን ቱኔዳዋ ማላቱ።

8 ሺን ቁማይ ኑና ያሳኮ ሺቃናዳን ማዴና። ኑኒ ማና ቆዴንቶካ ኑሲ ኣይኔ ፓጩና፤ ዋፕኔ ኑሲ ኣይኔ ፕጃቴና።

9 ሺን ሃዌ ሂንቱ ሂንቱ ደሶዋዳን ሃኒያዌ ሹጎ ኣማኑዋና ዴዲያዋንታ ናጋራን ዩጌና ማላ ናጌቲቱ።

10 ኣዩሲ ጎፕ፣ ኔኒ ኤራንቻይ ኤቃው ያርሼዳ ቁማ ማናው ኤቃ ጎሊያን ኡቲዳ ዋዴ፣ ሹጎ ኣማኑዋና ዴዲያ ኢቲ ኣሳይ ኔና ቤዖፕ፣ ኤቃው ያርሼዳ ቁማ ኢ ማናው ኣ ዋዛናይ ቆፕኔዬ?

11 ሄዋ ጊደፕ ሃ ሹጎ ኣማኑዋና ዴዲያ ኔ ኢሻይ፣ ኪሪሰቶሲ ኣ ዲራው ሃይቁዳዌ፣ ኔ ኤራን ባዬ።

12 ሃዋዳንካ፣ ሂንቱ ሂንቱ ኢሻቱዋ ናቂያዋኒኔ ኡንቱንቱ ሹጎ ዋዛና ማይሲያዋን ኪሪሰቶሳ ናቂታ።

13 ሄዋ ዲራው፣ ቁማይ ኣማኒያ ታ ኢሻ ቆቢያዋ ጊደፕ፣ ኣ ቆቤና ማላ፣ ታ ዴዲያ ላይላን ሙሌካ ኣሹዋ ሚከ።

# 9

ዩሱሲ ኪቲዳዋንቱሲ ዴዲያ ማታኔ ኡንቱንቱ ኦላናው ቤሲያባ

1 ታኒ ኣይሌቲላይ ባይና ኣሳ ጊዲኪታ? ዩሱሲ ኪቲዳዋ ጊዲኪታ? ኑ ጎዳ ዩሱሲ ኪሪሰቶሳ ቤዓቤይኪታ? ሂንቱንቱ ታኒ ጎዳሲ ኦሌዳ ታ ኦሱዋፕ ቤቲዳዋንታ ጊዲኪቲዬ?

2 ታኒ ሃራንቱሲ ዩሱሲ ኪቲዳዋ ጊዲያና ቆዮፕካ፣ ሂንቱንቶ ዩሱሲ ኪቲዳዋ ጊዲያዌ ኤሬቲዳዋ፤ ኣዩሲ ጎፕ፣ ታኒ ጎዳን ዩሱሲ ኪቲዳዋ ጊዲያዋ ሂንቱ ማርካ።

3 ታና ቦሪያዋንቱሲ ታኒ ኢሚያ ዛሩ ሃዋ።

4 ማናዉኔ ኡሻናው ኑሲ ማቲ ባዌ?

5 ዩሱሲ ኪቲዳ ሃራቱዋዳኒኔ ጎዳ ኢሻቱዋዳን፣ ቃሲ ጳዒርሳዋዳን፣ ኤኖ ጊያ ማቻቶ ኢቲፕ ኣኪዴ ባናው ኑሲ ማታይ ባዌ?

6 ዋይ ኑ ዴዑዋሲ ኦሌዴ ባዳታናው ቤሲያዌ ታናኔ ባርናባሳ ያላሌ?

7 እይ ዋዴኔ ባሬ ሚሻ ሚዳ፣ ዋታዳራቴላ ኦሊያዊ ኦኔ? ዋይ ዋዩኒያ ቱራ ቶኪዳ፣ ኦ ኦይፊያ ማናዊ ኦኔ? ዋይ ሚዛ ወዲያ ሄሚዳ፣ ሄ ሚዛ ወዲያፕ ማላ ኡሼናዊ ኦኔ?

8 ታኒ ሃዋ ኦሳ ቆፋ ዓላላን ጋይታ? ዋይ ሂጊ ቃሲ ሃዋ ጌኔ?

9 ኦዩሲ ጎፔ፣ ሙሴ ሂጊያን፣ «ካላ ዩዲያ ሚሂያ ዶና ቃቸፓ» ጌቴቴዳ ዓፊቴዳ፣ ያሳይ ሚሂያባ ቆፕዳ ሃዋ ጊ?

10 ዋይ ኢ ሄዋ ጊያዊ ሙሌካ ኑ ዲራሳ ጊዴኔ? ቱማካ ኑ ዲራው ዓፊቴዳ፣ ጎሺያ ቢታኒካ ካላ ቡኪያ ቢታኒካ፣ «ታና ጋኪያዋ ኦካና» ያጊዳ ኦላናው ቤሴ።

11 ኦኒ ሂንቴ ጊዶን ኦያና ዩወዋ ዜሬዳዋንታ ጊዲዳ፣ ኑ ኦሹዋሲ ማዶ ጊዲያዋ ሂንቴንቴፔ ጫኮፔ ዳርቤ?

12 ሃራቱ ሄዋ ሂንቴንቴፔ ኦካናው ኡንቴንቶ ማታይ ዴፖፔ፣ ኦሲ ኡንቴንቴዋፔ ኦዲያ ማታይ ባዌ?

ሺን ኦኒ ኪሪሰቶሳ ሚሺራቸዋ ቃላሲ ዱቦ ጊዳናዳን፣ ኡባባ ጌንጪያዋፔ ኦቲን፣ ሄ ማታን ጎዔቴቤይኮ።

13 ጌሻ ጎሊያን ኦሊያ ኦሳቱ ባሬንቴ ቁማ ጌሻ ጎሊያፔ ኦኪያዋ ኤሪኪቴ? ቃሲ ያርሺያሳን ኦሊያዋንቴ ያርሹዋፔ ኦኪያዋ ኤሪኪቴ?

14 ሃዋዳንካ፣ ቃሲ ሚሺራቸዋ ቃላ ኦዲያዋንቴ ባሬንቴ ዴዐዋሲ ኮሺያባ ኦፔ ዴማናዳን፣ ጎዳይ ኦዛዜዳ።

15 ሺን ታኒ ሃ ማታ ኡባን ኦይኔ ጎዔታቤይኬ። ታኒ ሃዋ ዓፊዳዊ ሄዋ ማላ ማታይ ታው ዴሳናው ቤሴ ያጊያዋና ጊዴና። ኦዩሲ ጎፔ፣ ታ ጩቁዋ ኦኒኔ ሜላ ኬሲያዋፔ ሃይቂያዊ ታው ሎዓ።

16 ሚሺራቸዋ ቃላ ኦዳናው ታኒ ኦዛዜታ ኡቴዳ ዲራው፣ ኦ ኦዶፔካ ታው ጩቁቴያባይ ባዋ። ሚሺራቸዋ ቃላ ኦዳናን ኦሳፔ፣ ታው ኦዩሮ።

17 ኦዩሲ ጎፔ፣ ታኒ ሃዋ ዶሳዴ ኦላፔ፣ ታው ዋይታይ ዴዔ። ሺን ታኒ ዶሴናን ኢፖፔካ፣ ሚሺራቸዋ ቃላ ዲራው ሃዳራ ያሳይ ታው ኦሚዳ።

18 ያፕፎ፣ ታ ዋይታይ ኦይ? ሚሺራቸዋ ቃላ ኦዳዳ፣ ታው ዋንጋላን ዴዒያ ኩሜንላ ማታን ጎዔቴናን፣ ሚሺራቸዋ ቃላ ጮ ኦዲያዋ።

19 ታኒ ኦሲኔ ኦይሌ ጊዲኬ ሺን፣ ጮራቱዋ ዛራናው ታና ኡባው ኦይሌ ኬሳዲ።



20 ታኒ አዪሁዳቱዋ ዛራናው ኡንቱንቱና ኡንቱንታ ጊዳዴ ዴዳዲ። ታ ሁጹው ሂጊያፔ ጋርሳና ዴዲኬ። ሺን ሂጊያፔ ጋርሳና ዴዲያዋንታ ዛራናው ሂጊያፔ ጋርሳና ዴዲያ አሳ ማላ ጊዳዲ።

21 ታኒ ሂጊ ባይና አሳቱዋና ዴዳዴ፣ ሂጊ ባይና አሳዳን ሃናዲ። ያሳ ሂጊ ጳዪና ጊዴና። ሺን ሂጊ ባይናዋንታ ዛራናው፣ ኪሪሰቶሳ ሂጊያፔ ጋርሳና ዴዲዲ።

22 ታኒ አማኑዋን ዳቡሪያዋንታ ዛራናው፣ ኡንቱንቱ ማላ ጊዳዲ። ታኒ አይ ኦጊያኒኔ አማራዳ አሳቱዋ አሻናው፣ ኡባ አሳቱዋና ኡባባኒ ኡንቱንቱ ማላ ጊዳዲ።

23 ታኒ ሚሺራቹዋ ቃላ አንጂዋ ሻካናው፣ ሚሺራቹዋ ቃላ ዲራው፣ ኡባባ ኦላይ።

24 ዋላን ያናና ጊዴ ዋዲያ ኡባይ ኢቲፔ ዋዴ። ሺን ኢቱዋ ያላላይ ዋይታ አኪያዋ ኤሪኪቱ? ሃዋዳን ሂንቱንቱካ ዋይታ አካናው ዋዲቱ።

25 ካሳው ባሪና ገገሲያ ኦኒኔ ኡባባኒ ባሪና ናጌ። አሳይ ሄዋ ዳቡሪያዋ ያኔዳዋ ኢሚቲያ ባዪያ አክሊሊያ ዴማናሳ። ሺን ኦኒ ዳቡሪያዋ ሜጲናው ዴዲያዋኔ ባዬና አክሊሊያ ዴማናሳ።

26 ሄዋ ዲራው፣ ታኒ ቆፊ ባይናን ዋዲያዋዳን ዋዲኬ። ጨርኩዋ ዪምፒያ አሳዳንካ ጮ ኦሌቲኬ።

27 ሺን ታኒ ሃራንቶ ኦዴዳዋፔ ጉዪያን፣ ታ ሁጹው ዋይታፔ አቴና ማላ፣ ታ አሳቱላ ናጌታናዳን ኦላይ።

# 10

## ኤቃው ጎዪናናው ቤሴና

1 ሄዋ ቦላን ታናዳን አማኒያዋንቶ፣ ታኒ ሂንቱ ሃዋ ኤራና ማላ ኮያይ። ኦ አዋቱ ኡባይ ሻሪያፔ ጋርሳና ዴዴዲና፤ ኡባይካ አባ ጊደና ፒኔዲና።

2 ኡንቱንቱ ኡባይ ሙሴና ኢቲፔ ጊዳናው፣ ሻሪያኒኔ አባን ፃማቄቲዲና።

3 ኡንቱንቱ ኡባይ ሄ ኢቲ አያና ቁማ ሚዲና።

4 ቃሲ ኡባይካ ሄ ኢቲ አያና ኡሻ ኡሹዲና። አዪሲ ጎፔ፣ ኡንቱንቱ ባሪንታ ካሌሊያ አያና ዛላፔ ፕልቶዋ ኡሹዲና፤ ሄ ዛላይካ ኪሪሰቶሳ።

5 ሺን ያሳይ ኡንቱንቱ ዳሪያ ባጋቱዋን ናሹቲቤና ዲራው፣ ኡንቱንቱ አጋይ አሳይ ባይና ሳን ላሌቱዳ።

10:1 ኬሰ 13:21-22፤ 14:22-29    10:3 ኬሰ 16:35    10:4 ኬሰ 17:6፤  
ፓይ 20:11    10:5 ፓይ 14:29-30

6 ኡንቲንቲ ኢታባ አሞቴዳዎዳን፡ ኑ ዎዛናይ ቃሲ ኢታባ አሙዎፔ ናጌታናዳን፡ ሄዌ ኡባይ ኑሲ ቲሚርቲ ጊዴዳ።

7 ያሳ ማፃፋይ፡ «አሳይ ማናውኔ ኡሻናው ኡቴዲና፤ ቃሲ ዲር ዴንዲ ኤቄዲና» ያጊያዎዳን፡ ኡንቲንቲ ኢቲ ኢቲ ኤቃው ጎዪኔዳዎዳን፡ ሂንቲ ጎዪኖፒቲ።

8 ኡንቲንቲ ኢቲ ኢቲ ዎሹሜዳዎዳን፡ ኑኒ ዎሹማናው ቤሴና። ሄዎ ጋሱዎን ኡንቲንቲ ኢቲ ጋላሲ ላታማኔ ሄዙ ሻዓይ ሃይቄዳ።

9 ኡንቲንቲ ኢቲ ኢቲ ጎዳ ፓጪዴ፡ ሾሻን ዲኩቲ ሃይቄዳዎዳን፡ ኑኒ ጎዳ ፓጪናው ቤሴና።

10 ኡንቲንቲ ኢቲ ኢቲ ዙዙሚና፡ ዎዲያ ኪታንቻን ኡንቲንታ ዳዪሴዳዎዳን ዙዙሞፒቲ።

11 ሃዌ ኡባይ ሃራቲሲ ቲሚርቲ ጊዳናዳን ኡንቲንቲ ቦላ ጋኬዳ። ቃሲ ኑና ዎዲያ ዉርሴላይ ጋካና ማቴዳዎንታ ሴራናው ፃፌቲዳ።

12 ሄዎ ዲራው፡ ሚና ኤቃዲ ጊዴ ቆፒያ ኡራይ ኮኔኔ ኩንዴናዳን፡ ባሬና ናጎ።

13 ሂንቲንታ ጋኪያ ፓጪ፡ አሳ ኡባ ጋኪያ ፓጪያ ማላፔ አቲን፡ አይኔ ዲማቲና፡ ሂንቲንቲ ዎልቃይ ዳንዳዪያዎፔ አዲያ ፓጪያን ሂንቲ ፓጪያታናው ኮዬና ያሳይ አማኔቲዳዎ። ሺን ሂንቲንታ ፓጪ ጋኪያ ዎዴ፡ ሄ ፓጪያ ኢ ሂንቲንታ ዳንዳዪሳና። ቃሲ ሄ ፓጪያፔ ሂንቲንቲ ኬሲያ ኦጊያካ ኢ ኢማና።

14 ሄዎ ዲራው፡ ታ ደሲያዎንቶ፡ ኤቃው ጎዪኖፒቲ።

15 ሂንቲንቲ ዎዛናማ አሳ ጊዴዳ ዲራው፡ ታኒ ሂንቲንቶ ኦዳይ። ታኒ ጊያዎ ሂንቲ ፒርዲቲ።

16 ኑኒ ያሳ ጋላቲዴ ሻኪያ አንጂዎ ፀዓይ ኪሪሰቶሳ ሱላና ኢቲፔቲላይ ዴዲያዎ ጊዴኔ? ቃሲ ኑኒ ሜንሊያ ኡኪላይ ኪሪሰቶሳ አሹዎና ኢቲፔቲላይ ዴዲያዎ ጊዴኔ?

17 ኢቲ ኡኪላይ ዴዲያ ዲራው፡ ኑኒ ጮራ ጊደፔካ፡ ኢቲ አሳቲላ፡ አዪሲ ጎፔ፡ ኑኒ ኡባይካ ሄ ኢቲ ኡኪላ ሻኬቲቶ።

18 ኢሰራዔሊያ አሳ ፃሊቲ። ያርሹዎ ሚያዎንቲ ያርሺያሳና ኢቲፔቲላይ ዴዲያዎንታ ጊዲኪኖ?

19 ሲሚ ታኒ ዎጋይታ? ኤቃሲ ያርሹቲዳ ቁማይ ማዲ ዎይ ኤቃይ ማዲ?

---

10:6 ጾይ 11:4    10:7 ኬስ 32:6    10:8 ጾይ 25:1-18    10:10 ጾይ 16:41-49    10:18 ዎግ 7:6

20 ማዴና፤ ሺን ታኒ ጊያዌ ያሳ አማኔና አሳቱ ኢታ አያናቱዋሲ ያርሺያዋፔ አቲን፡፡ ያሳው ያርሺኪና፡፡ ኢታ አያናቱዋና ሂንቴ አቲፔ ዙፔታና ማላ፡ ታኒ ኮዪኬ፡፡

21 ጎዳ ፀ-ዓፔ ኡሺዳ ቃሲ ኢታ አያናቱዋ ፀ-ዓፔ ኡሻናው ሂንቴ ዳንዳዪኪታ፡፡ ጎዳ ጋይታፔ ሂንቴ ጊሼቲዳ ቃሲ ኢታ አያናቱዋ ጋይታፔ ማናው ዳንዳዪኪታ፡፡

22 ሄዋ ኡዲዳ ኮኒ ጎዳና ዒናታናው ኮሺ? ኮኒ አፔ ሚኔቶ?

23 ሂንቴፔ አቱ አቱ፡ «ኡባባ ኦላናው ታና ዲጊያባይ ባዋ»፤ ሺን ኡባባይ ማዴና፡፡ «ኡባባ ኦላናው ዲጊያባይ ባዋ፤ ሺን ኡባባይ ጌሼና» ያጊና፡፡

24 ኦኒኔ ሃራ አሳ ማዲያባ ቆፖፔ አቲን፡ ሃራይ አቶ አቱኔ ባሬና ማዲያባ ቆፖፖ፡፡

25 ጌያን አፃሬ ታራን ዛሊዔቲያ አሹዋ ሂንቴ ዋዛና ቆፋን፡ አይኔ ሲዴናን ሚቲ፡፡

26 አዪሲ ጎፔ፡ አላሚኔ አኒ ዳዒያባይ ኡባይ ጎዳባ፡፡

27 አቲ አማኔና አሳይ ሂንቴንታ አማላ ኡዲ ሸባናው ያሲና ባናው ኮዮፔ፡ ሂንቴ ዋዛና ቆፋን፡ አይኔ ሲዴናን ሂንቴ ሲንላ ኢ አሊያባ ኡባ ሚቲ፡፡

28 ሺን አቲ ኡራይ ሂንቴንቶ፡ «ሃዌ ኤቃው ያርሺዳዋ» ጎፔ፡ ሄ ሂንቴንቶ ኦዴዳ ቢታኒያ ዲራዉኔ ቃሲ ሂንቴ ዋዛና ቆፋ ዲራው፡ ሄ ቁማ ሞፒቲ፡፡

29 ታኒ ጊያዌ ኔ ዋዛና ቆፋ ዲራሳ ጊዴና፤ ሺን ዮኮ ቢታኒያ ዋዛና ቆፋ ዲራሳ፡፡

ታኒ ታ ሃናናው ዳንዳዪያ ታ ሃኖታ ሃራ አሳ ዋዛናይ አያው ፒርዲ?

30 ታኒ ያሳ ጋላታዳ ቁማ ሞፔ፡ ያሳ ጋላታዳ ሜዳ ቁማው አያው ቦሬታይታ?

31 ሲሚ ሂንቴ አያኔ ሞፔ፡ ዋይ አያኔ ኡሾፔ፡ ዋይ ሂንቴ አያኔ ኡዶፔ፡ ኡባባ ያሳ ቦንቹዋሲ ኦሊፔ፡፡

32 ሂንቴንቱ አዪሁዳ አሳቱዋሲ ዋይ ጊሪኬ አሳቱዋሲ ዋይ ያሳ አማኒያዋንቱሲ ቋቦ ጊዶፒቲ፡፡

33 ታኒ ቃሲ ጮራቱ አታና ማላ፡ ኡንቴንቱ ኡባ ማዳናዲፔ አቲን፡ ታ ሁጳው ማዲያ ኮዬናን፡ አሳ ኡባ ኡባባኒ ናሼቲያዋዳን፡ ሂንቴንቱካ ሄዋዳ ኡዲቲ፡፡

# 11

1 ታኒ ኪሪስቶሳ ለሚሱዋ ካሊያዋዳን፣ ሂንቴንቴካ ታዋ ካሊቴ።

አሳይ ኢቲፔ ዋሲያ ዋዴ ዴዓናው ቤሲያ ዋጋ

2 ታናዳን አማኒያዋንቶ፣ ሂንቴ ኡባባኒ ታና ሃሳዪያ ዲራውኔ፣ ዋጋ ታኒ ሂንቴንቶ አሜዳዋዳን፣ ሂንቴ ሚኒሲዴ ናጊያ ዲራው፣ ሂንቴንታ ጋላታይ።

3 ሺን ኪሪስቶሲ አቱማዋ ኡባው ሁጴ ጊዲያዋ፣ አቱማ አሳይ ማጫ አሳሲ ሁጴ ጊዲያዋኔ ቃሲ ያሳይ ኪሪስቶሳሲ ሁጴ ጊዲያዋ ሂንቴ ኤራና ማላ ኮያይ።

4 ያሳ ዋሲዴ፣ ዋይ ቲምቢቲያ ኦዲዴ፣ ባሬ ሁጲያ ጎዚያ አቱማ አሳይ ኡባይ ኪሪስቶሳ ቶቼ።

5 ቃሲ ያሳ ዋሳዴ ዋይ ቲምቢቲያ ኦዲዴ፣ ባሬ ሁጲያ ጎዜና ማጫወና ባሬ አሲና ቶቻው፤ አያው ጎፔ፣ ኢዛ ባሬ ሁጲያ ሜዴታዲጎኒና ኢቲ ማላ።

6 ማጫወና ባሬ ሁጲያ ጎዛና ቋጥፔ፣ ቃንዲሱ። ሺን ኢዛ ባሬ ሁጲያ ቃንዲሳናዌ ዋይ ሜዲሳናዌ ፖኮፔ፣ ባሬ ሁጲያ ጎዙ።

7 አቱማዌ ያሳ ለሚሱዋን ቦንቹዋ ጊዲያ ዲራው፣ ባሬ ሁጲያ ጎዛናው ቤሴና፤ ሺን ማጫወና አቱማዋሲ ቦንቹ።

8 አዪሲ ጎፔ፣ ማጫወና አቱማዋፔ ቤታዲፔ አቲን፣ አቱማዌ ማጫወኒፔ ቤቲቤና።

9 አዪሲ ጎፔ፣ ማጫወና አቱማዋ ዲራው ሜዴታዲፔ አቲን፣ አቱማዌ ማጫወኒ ዲራው ሜዴቲቤና።

10 ሄዋ ዲራው፣ ማጫወና ባሬ አሲና አዪሱዋፔ ጋርሳና ዴዒያዋ ኤሪሳናወኔ ኪታንቻቱዋ ዲራው፣ ኢዚ ሁጲያን ጎዚያባይ ዴዓናው ቤሴ።

11 ሺን ጎዳን ማጫወና አቱማዌ ባይናን ዴዑኩ፤ አቱማዌካ ማጫወና ባይናን ዴዒና።

12 አዪሲ ጎፔ፣ ማጫወና አቱማዋፔ ሜዴቲዳዋዳን፣ ቃሲ አቱማዌካ ማጫወኒፔ ዩሌቴዳ። ቃሲ ኡባባይካ ያሳፔ ዩ።

13 ሂንቴንቴ ሂንቴ ሁጴው ፒርዲቴ። ማጫወና ባሬ ሁጲያ ጎዜናን ያሳ ዋሳናው ቤሲ?

14-15 አቱማዌ ባሬ ሁጲያ ዲቾፔ፣ አው ፖኮ። ሺን ማጫወና ባሬ ሁጲያ ዲቾፔ፣ ኢዚው ቦንቹ ጊዲያዋ ሃራይ አቶ።

ሜዴቲንቶኔ ሂንቲንታ ታማሪሴኔ? ኣዩሲ ጎፔ፡ ማጫዉኒ ሁጲ ኢዞ ካማናው ኢዚው ኢሚቴዳ።

16 ሺን ኦኒኔ ሃ ዩዉዋን ፓሉሜታናው ኮዮፔ፡ ኑሲ ጊዲና ዋይ ያሳ ኣማኒያዋንቶ ጊዲናካ፡ ሃዋፔ ሃራ ዋጋይ ባዋ።

ጎዳ ካዉዋ ኣኪያ ዋጋ

(ማጥ 26:26-29፤ ማር 14:22-25፤ ሉቅ 22:14-20)

17 ሂንቲ ሸቂያዊ ኢታባሳፔ ኣቲን፡ ሎዖባሳ ጊዴና ዲራው፡ ታኒ ሃ ኣዛዙዋ ኢማዴ ሂንቲንታ ጋላቲኬ።

18 ሺን ሂንቲ ዋሳ ጎሌን ሸቂያ ዋዴ፡ ሂንቲ ጊደን ጳልቁላይ ዴዒያዋ ታኒ ሲሳይ። ቃሲ ሄዌ ኢቲ ባጋና ቱማ ጊዲያዋ ኣማናይ።

19 ኣዩሲ ጎፔ፡ ሂንቲ ማታን ኣማኔቴዳዋንቱ ቆንጩ ኤሬታና ማላ፡ ሂንቲ ጊደኒካ ቃሲ ሻኩ ዴዓናው ቤሴ።

20 ሄዋ ዲራው፡ ሂንቲ ኢቲፔ ሸቂያ ዋዴ፡ ሂንቲ ሸቁ ጎዳ ካዉዋ ማናሳ ጊዴና።

21 ኣዩሲ ጎፔ፡ ሂንቲ ቁማ ሚያ ዋዴ፡ ኡባይ ሁጲያን ሁጲያን ባሬዋ ባሬዋ ሚያ ዲራው፡ ኢቲ ኮሻቴ፤ ኢቲ ቃሲ ማሉቴ።

22 ማናዉኔ ኡሻናው ሂንቲንቶ ጎሊ ባዌ? ዋይ ያሳ ዋሳ ጎሊያ ካጳቲ? ቃሲ ኣይኔ ባይናዋንታ ዩላዩቴ? ታኒ ሂንቲንታ ዋሳ? ሃ ዩዉዋን ታኒ ሂንቲንታ ጋላቶ? ጋላቲኬ።

23 ኣዩሲ ጎፔ፡ ታኒ ቃሲ ሂንቲንቶ ኢሜዳ ቲሚርቲያ ጎዳፔ ኣካዲ። ጎዳ ዩሱሲ ኡንቲንቲ ኣ ኣሌዴ ኢሜዳ ቃማ ዳቡዋ ኣኪዴ።

24 ያሳ ጋላቲዳ፤ ዳቡዋ ማንሊዴ፡ «ሃይቲ፤ ሚቴ። ሃዌ ሂንቲ ጊሻታው ባሬና ኢሜዳ ታ ኣሹዋ። ሃዋን ታና ቆፒቴ» ያጌዳ።

25 ሃዋዳንካ፡ ካዉዋ ሚዴ ሲሚና፡ ፀዓ ቃሲ ኣኪዴ፡ «ሃዌ ፀዓይ ታ ሱላን ታኒ ጫቁዳ ኦራላ ጫቁዋ። ሂንቲንቲ ኣፔ ኡሹዳ ዋዴ ኡባን ሄዋን ታና ቆፒቴ» ያጌዳ።

26 ኣዩሲ ጎፔ፡ ሂንቲ ሃ ዳቡዋ ሜዳ ዋዴ ኡባኒኔ ሃ ፀዓፔ ኡሹዳ ዋዴ ኡባን ጎዳይ ያና ጋካናዉካ፡ ኣ ሃይቁዋ ኦዲታ።

27 ሄዋ ዲራው፡ ቤሴናን ዴዒዴ ጎዳ ዳቡዋ ሚያዌ፡ ዋይ ጎዳ ፀዓፔ ኡሹያዌ ኦኒኔ ኣ ኣሹዋኔ ኣ ሱላ ኣጮቴ።

28 ሺን ኣሳይ ባሬ ሁጲያ ፓጮ። ያቲዴ ዳቡዋ ሞ። ፀዓፔካ ኡሹ።

29 ኣዩሲ ጎፔ፡ ጎዳ ኣሹዋ ሻኪዴ ኤሬናን ዳቡዋ ሚያዌኔ ፀዓፔካ ኡሹያዌ ባሬ ሁጲዋ ፒርዳ ሜኔ ኡሹ።

11:23 ማጥ 26:26-28፤ ማር 14:22-24፤ ሉቅ 22:19፣ 20 11:25 ኬሲ 24:6-8፤ ኤርሞ 31:31-34

30 ህዋ ዲራው፣ ሂንቲ ገደን ጮራቱ ዳቡራንቻኔ ሃርጋንቻ ገዴዲኖ፤ ቃሲ ኡንዴኔዳዋንቱ ሃይቁዲኖ።

31 ሺን ኮኒ ኑ ሁጲያ ቱሙ ፓጩዳንቶ፣ ያሳይ ኑና ፒርዴና።

32 ኮኒ ፒርዴቲያ ዎዴ፣ ሃ ኣላሚያና ኢቲፔ ፒርዴቲና ማላ፣ ጎዳይ ኑና ሴሬ።

33 ህዋ ዲራው፣ ታናዳን ኣማኒያዋንቶ፣ ጎዳ ካዉዋ ማናው ሂንቲ ሺቁያ ዎዴ፣ ኢቱ ኢቱዋ ናገቲ።

34 ኢኒኔ ኮሻቲዳዋ ገደፔ፣ ኢቲፔ ሺቁያ ዎዴ ያሳ ፒርዳን ሂንቲ ጌሌና ማላ፣ ባሬ ሶዪን ሞ።

ኣቲዳዋ ታኒ ያ ባዴ ገገሳና።

# 12

## ጌሻ ኣያና ኢሞታቱዋ

1 ታናዳን ኣማኒያዋንቶ፣ ጌሻ ኣያና ኢሞታታ ባህንቲ ኤራናው ኮያይ።

2 ሂንቲንቲ ያሳ ኣማኒና ዎዴ፣ ኡባ ዎዴ ካሊያዋዳንካ፣ ሃሳዬና ኤቃቱዋኮ ሂንቲ ቤዳዋ ኤሪታ።

3 ህዋ ዲራው፣ ያሳ ኣያናይ ካሌሌያ ኣሳይ ኮኒኔ፣ «ዩሱሲ ሸቆቶ» ያገዴ ሃሳዬናዋኔ ቃሲ ጌሻ ኣያናይ ካሌላፔፔ ኣቲን፣ ሃራይ ኣቶ ኢቲ ኣሳይኔ፣ «ዩሱሲ ጎዳ» ጋናው ዳንዳዬናዋ ታኒ ሂንቲንታ ኤሪሳይ።

4 ኣያና ኢሞታይ ዲማ ዲማ፤ ሺን ኢሚያ ኣያናይ ኢቱዋ።

5 ቃሲ ኦሊያ ኦሱ ዲማ ዲማ፤ ሺን ጎዳይ ኢቱዋ።

6 ኦሱዋ ኦሳናው ዲማ ዲማ ኦገ ዴሲሺን፣ ሄ ኦሊያ ኦገያ ኡባ ኣሳ ኡባው ቆንጨሲያ ያሳይ ኢቱዋ።

7 ሺን ኣሳ ኡባ ማዳናው፣ ጌሻ ኣያና ቆንጨሲያ ዎልቃይ ኡባው ሁጲያን ሁጲያን ኢሜቲዳ።

8 ኣዪሲ ጎፔ፣ ጌሻ ኣያናይ ኢቱዋሲ ኣጼ ኤራቲላ ሃሳያ ኢሜዳ፤ ቃሲ ኢቱዋሲ ኤራቲላ ሃሳያ ኢሜዳ።

9 ሄ ጌሻ ኣያናይ ኢቱዋሲ ኣማኑዋ ኢሚዴ፣ ዮኮዋሲ ሃርጋንቻ ፓሊያ ዎልቃ ኢሜዳ።

10 ጌሻ ኣያናይ ኢቱዋሲ ማላታ ኦሊያ ዎልቃ ኢሚዴ፣ ኢቱዋሲ ቲሞቢቲያ ኦዲያ ዎልቃ ኢሜዳ። ኢቱዋሲ ኣያናቱዋ ገዲዋን ዴዲያ ዲማቲላ ኤሪያ ዎልቃ ኢሚዴ፣ ኢቱዋሲ ዲማ ዲማ ቃላን ሃሳዪያ ዎልቃ ኢሜዳ። ቃሲ ኢቱዋሲ ዲማ ዲማ ቃላን ሃሳዪዳዋ ቢሊያ ዎልቃ ኢሜዳ

11 ሺን ሃ ኡባባ ኦሊያዌ ሄ ኢት ጌሻ አያና። አሳ ኡባው ኢ ባሬ ኮዪያዎዳን፣ ዲማ ዲማ ኢሞታ ሻኪ ሻኪዴ ኢሚዳ።

ኢት ቦላን ዳዒያ ዲማ ዲማ አሳቴላቱዎ

12 ኪሪሰቶሲ ጮራ አሳቴላቱ ዳዒያ ኢት ቦላ ማላ። ቦላይ ጮራ አሳቴላቱዎ፤ ማዴቲዳዎ ጊደፔካ፣ ኢት ቦላ።

13 አዪሲ ጎፔ፣ ኮኒ አዪሁዳ አሳ ጊደፔኔ ዎይ ጊሪኬ አሳ ጊደፔ፣ ዎይ አይሌ ጊደፔኔ ዎይ ዎማኖ ጊደፔ፣ ኡባይ ኢት ጌሻ አያናን ኢት ቦላ ጊደናው ፃማቄቴድ። ቃሲ ኮኒ ኡባይ ኢት ጌሻ አያና ኡሼድ።

14 አዪሲ ጎፔ፣ ቦላሲ አሳቴላይ ጮራ ጊዲያዎ፤ ኣቲን፣ ኢቱዎ ጊዳና።

15 ጌዲ፣ «ታኒ ኩሺያ ጊዳና ዲራው፣ ቦላ ቆሞ ጊዲኬ» ጎፔ፣ ኢ ሄዎ ጊያዌ ቦላ ቆሞ ጊዲያዎ ዲጋኔ?

16 ሃይላይካ፣ «ታኒ አይፊያ ጊዳና ዲራው፣ ቦላ ቆሞ ጊዲኬ» ጎፔ፣ ኢ ሄዎ ጊያዌ ቦላ ቆሞ ጊዲያዎ ዲጋኔ?

17 ቦላይ ኡባይ አይፊያ ፃላላ ጊዲንቶ፣ ዎቲዴ ሲሳናው ዳንዳዪ? ቃሲ ቦላይ ኡባይ ሃይላ ፃላላ ጊዲንቶ፣ ዎቲዴ ሲንጋናው ዳንዳዪ?

18 ሺን ያሳይ ባሬ ኮዬዳዎዳን፣ ቦላ አሳቴላቱዎ ኢቱዎ ኢቱዎ ቦላን ዎሌዳ።

19 ኡባይ ኢት ቆሞ ጊዲንቶ፣ ቦላይ ሃቃን ዳዓኔ?

20 ሺን አሳቴላቱ ጮራ ጊደፔካ፣ ቦላይ ኢቱዎ።

21 አዪፊ ኩሺያ፣ «ኔኒ ታና ኮሻካ» ጋናው ዳንዳዪና። ዎይ ቃሲ ሁጺ ጌዳቱዎ፣ «ሂንቴንቴ ታና ኮሺኪታ» ጋናው ዳንዳዪና።

22 ሺን ላፋ ማላቲያ ቦላ አሳቴላቱ ሎይሌ ኮሺያዎንታ።

23 ቦላ አሳቴላቱዎ፤ ቦንቼቴናዎንታ ኮሲ ማላቲያዎንታ ኮኒ ሎይሌ ቦንቼቶ። ቃሲ ኮና ዬላዪያ ቦላ አሳቴላቱዎካ ሎይሌ ቦንቼቶ።

24 ኑ ቦላ፤ ቤቲያ ባጋው ማዩ ኮሺና፤ ሺን ፖኪያ ባጋ አሳቴላቱዎ ሎይሌ ማዩዛናዳን፣ ያሳይ አሳቴላ ኢቲ፤ ጋሌዳ።

25 ቦላ አሳቴላቱ ኢቱ ኢቱዎሲ ኢት ማላ ቆፋ ቆገና፤ ኣቲን፣ ቦላን ዲማቴላይ ዳዓናው ቤሴና።

26 ቦላ አሳቴላቱዎ፤ ኢቱ ሴሌቶ፤ ቦላ አሳቴላቱ ኡባይካ አናና ሴሌቲኖ፤ ቦላ አሳቴላቱዎ፤ ኢቱ ቦንቼቶ፤ ቦላ አሳቴላቱ ኡባይ አናና ናሼቲኖ።

27 ሂንቴንቱ ኡባይ ኪሪሰቶሳ ቦላ፤ ቃሲ ሁጲያን ሁጲያን ሂንቴ ኡባይካ ኣ ቦላ ኣሳቴላቱዎ።

28 ያሳይ ዎሳ ጎሌን ኢቲ ኢቲ ኣሳቱዎ፡ ኮይሩዎን ዬሱሲ ኪቴዳዎንታ፡ ላዔንሉዎን ናባቱዎ፡ ሄዜንሉዎን ታማሪሲያዎንታ፡ ሄዎፕ ጉዪያን፡ ማላታ ኦሲያዎንታ፡ ሄዎፕ ጉዪያን፡ ፓሲያ ዎልቃይ ዴዒያዎንታ፡ ማዲያዎንታ፡ ዎሳ ጎሊያ ኣዪሲያዎንታ ዲማ ዲማ ቃላን ሃሲያዎንታ ኦሌዳ።

29 ኡባቱ ዬሱሲ ኪቴዳዎንቱ? ኡባቱ ናባቱ? ኡባቱ ታማሪሲያዎንቱ? ኡባቱ ማላታ ኦሊኖ?

30 ኡባሲ ፓሲያ ዎልቃይ ዴዒ? ኡባቱ ዲማ ዲማ ቃላን ሃሳዪኖ? ቃሲ ዲማ ዲማ ቃላን ሃሳዬዳዎ ኡባቱ ቢሊኖ?

31 ሺን ኡባፕ ኣጲያ ኣሞታ ሎይሉ ኮዪቴ።  
ቃሲ ኡባፕ ሎይሉ ኣጲያ ኦጊያ ታኒ ሂንቴንታ ቤሳና።

# 13

## ቱሙ ሲቁዎ

1 ታኒ ኣሳ ቃላኒኔ ኪታንቻ ቃላን ሃሳዮፕካ ታው ሲቁ ጳዮፕ፡ ታ ሃሳያይ ጮ ዎሲያ ዳዎላ ማላ፤ ዎይ ቆልጫካቲያ ዓናዒሊያ ማላ።

2 ናቤቴላ ኣሞታይ ታው ዴያፕካ፡ ታኒ ጌሜዳ ዬወዎ ኡባኔ ኤራቴላ ኡባ ኤሪንቶካ፡ ቃሲ ዴሪያ ዴንሉ ዲጊያ ኣማኑ ታው ዴያፕካ፡ ሲቁ ጳዮፕ፡ ታኒ ኣያኔ ጊዲኬ።

3 ታው ዴዒያዎ ኡባ ሂዬሳቱዎ ማዛናው ኣሚንቶካ ሃራይ ኣቶ፡ ታ ቦላ ታማን ጉዳናው ኣላ ኣሚንቶካ ሲቁ ጳዮፕ፡ ታና ኣይኔ ማዳና።

4 ሲቁ ዳንዳያንቻ። ሲቁ ኬኬ። ሲቁ ቃናቴና። ጨቁቴና፤ ቃሲ ኦቶሬቴና።

5 ሲቁ ባሬው ቤሴናዎ ኦሌና፤ ኡዜቴና፤ ዪሎቴና፤ ሲቁ ናቁቴዳዎካ ፓይዳና።

6 ሲቁ ቱማቴላን ናሼቲያዎፕ ኣቲን፡ ዎርዲዎን ናሼቴና።

7 ሲቁ ኡባባ ዳንዳይ። ኡባባይካ ሃናናዎ ጊዴ፡ ናሼቻን ናጌ። ኡባባኒ ጌንጨ።

8 ሲቁ ሙሌካ ጳዬና። ሺን ናቤቴላይካ ኣታና። ዲማ ዲማ ቃላን ሃሳዪያዌካ ኣታና። ኤራቴላይካ ጳያና።

9 ኣዪሲ ጎፕ፡ ኦኒ ኤራቴላፕ ፓጫ ኤሬቶ፤ ቲሞቢቲያፕካ ፓጫ ኦዴቶ።

12:28 ኤፌ 4:11    13:2 ማኑ 17:20፤ 21:21፤ ማር 11:23



10 ሺን ኩሜንሳ ጊዳዳዌ ዪያ ዎዴ፣ ፓጫይ ቋንቋ።

11 ታኒ ናባቴላን ዳዊያ ዎዴ፣ ናባዳን ሃሳያይ። ናባዳን ቆፓይ። ቃሲ ናባዳንካ አከካይ። ዎዳላ ጊዳዳ ዎዴ፣ ናባቴላ ሃኑዎ አጋዲ።

12 ኑኒ ሃዒ ቤዒያዌ ማሰቶቲያን ቤዒያ ለምዒ ለምዒያ ማላ ማላ፤ ሺን ሄ ዎዴ ኑኒ ኑ አይፊያን ቆንጨያን ቤዒና። ሃዒ ታኒ ኤራቴላፔ ፓጫ ኤራይ፤ ሺን ያሳይ ታና ዉርሲዴ ኤሪያዎዳን፣ ሄ ዎዴ ታኒካ ዉርሳ ኤራና።

13 ሺን ሄዎ ጊዳፔ፣ አማኑ፣ ሃናናዎ ጊዴ ናሹቻን ናጊያዌኔ ሲቁ፣ ሃዎንቱ ሄዛቱ ሚኒዴ ዳዒና። ሃዎንቱፔ አጁያዌ ሲቁዎ።

# 14

## ጌሻ አያና አሞታኔ ኡንቲንቱ ማዲዎ

1 ሲቁዎ ካሊቲ። አያና አሞታካ ሎይሌ ኮዪቲ። ሺን ኡባፔ አሊዴ፣ ናቤቴላ ኮዪቲ።

2 አዪሲ ጎፔ፣ ዲማ ዲማ ቃላን ሃሳዪያ ኡራይ ያሳው ሃሳዬፔ አቲን፣ አሳሲ ሃሳዬና። አዪሲ ጎፔ፣ ኢ ሃሳዪያዎ ኦኒኔ አከከና። ሺን አሳሲ ቆንጨቤና ዬዉዎ አያና ዎልቃን ሃሳዬ።

3 ሺን ናቢ አሳ ማዳናው፣ ዞራናዉኔ ሚኒሳናው አሳሲ ሃሳዬ።

4 ዲማ ዲማ ቃላን ሃሳዪያ ኡራይ ባሬና ማዴ። ሺን ናቢ ዎሳ ጎሊያ ማዴ።

5 ሂንቲንቱ ኡባይ ዲማ ዲማ ቃላን ሃሳያናዎ ታኒ ደሳይ። ሺን ናቤቴላ ሄዎፔ አላዴ ደሳይ። አዪሲ ጎፔ፣ ዲማ ዲማ ቃላን ሃሳዪያዌ ሄ ሃሳዬዳዎ ዎሳ ጎሊያ ማዳናው ቢሊያ አሳይ ቋንቋ፣ ዲማ ዲማ ቃላን ሃሳዪያዎፔ ናቤቴላይ አዴ።

6 ሺን ታናዳን አማኒያዎንቶ፣ ሃዒ ታኒ ሂንቲንቱኮ ባዴ፣ ዲማ ዲማ ቃላን ሃሳያዴ፣ ሳፃን ዎይ ኤራቴላን ዎይ ናቤቴላን ዎይ ታማሪሲያዎን ሂንቲንቱሲ ኡዳና ቋንቋ፣ ታኒ ሂንቲንታ አያ ማዳይታ?

7 ሃራይ አቶ፣ ሺምፑ ባይናባይ ሱሱሊያ ጊዲና ዎይ ዲላ ጊዲና ካዒዴ፣ ባሬ ካሳ ዲማቴላ ኤሪሳና ቋንቋ፣ ሱሱሊያ ፑኖፔኔ፣ ዎይ ዲላ ዲያፔ፣ አሳይ ዎቲዴ ኤራኔ?

8 ቃሲ ፀራምባ ዋሱ ሎይሌ ኤራታና ቋንቋ፣ ኦላው ኦኔ ጊጌታናዌ?

9 ሃዎዳንካ፣ ቃሲ ዲማ ዲማ ቃላን ሂንቲ ሃሳዪያዌ ቆንጨ። ጊዴናን ቋንቋ፣ ሂንቲ ሃሳዪያዎ አሳይ ዎቲ አከካይ? አዪሲ ጎፔ፣ ጨርኩዋሲ ሂንቲ ሃሳዪታ።

10 ሃ አላሚያን ጮራ ቃላይ ዳዔ፤ ሺን ቢሌላይ ባይና ቃላይ ኢቲኔ ባዎ።

11 ሺን ኢቲ አሳይ ሃሳዪያ ቃላ ታኒ ኤራና ቆየ፣ ሄ ሃሳዪያዎ ታው ኢማላ ጊዳ፤ ታኒካ አው ኢማላ ጊዳይ።

12 ሃዎዳንካ፡ ቃሲ ጌሻ አያና ኢሞታ ሂንቲ አካናው ሎይሊ ኮዪያዋንታ ጊዲያ ዲራው፡ ዎሳ ጎሊያ ዲቻናው ማዳዎ ኡባባ፤ አሊዳ ኮዪቲ።

13 ሄዎ ዲራው፡ ዲማ ዲማ ቃላን ሃሳዪያዎ ባሬ ሃሳዬዳዎ ቢላናው ዳንዲያና ማላ፡ ያሳ ዎሶ።

14 አዪሲ ጎ፣ ታኒ ዲማ ዲማ ቃላን ያሳ ዎሶ፣ ታ አያናይካ ዎሶ፤ ሺን ታ ጋርሳ ቆፋይ አይኔ ጎዔ፣።

15 ያቲና፡ ታኒ ዎቶ? ታኒ ታ አያናን ያሳ ዎሳና፤ ቃሲ ታ ቆፋንካ ያሳ ዎሳና፡ ታ አያናን ዬፃና፤ ቃሲ ታ ቆፋንካ ዬፃና።

16 ሄዎ ጊዳና ቆየ፣ ኔኒ ኔ አያና ፃላላን ያሳ ጋላቲያዎ ጊደ፣ ሄ ሳዓን ኔኒ ጊያዎ ኤሬና አሳይ ኔኒ ያሳ ጋላቲያዎ ኤሬናን፡ ኔኒ ጋላቲያዎን ዎቲዳ፡ «አሜን» ጋኔ?

17 ኔኒ ያሳ ጋላቲያዎ ሎዓ፤ ሺን ሄዎ ዮኮ ቢታኒያ ማዴና።

18 ታኒ ዲማ ዲማ ቃላን ሂንቲ ኡባ፤ አላዳ ሃሳዪያ ዲራው፡ ያሳ ጋላታይ።

19 ሺን ታኒ ዎሳ ጎሊን ሃራቱዎ ታማርሳናው ዲማ ዲማ ቃላን ታው ሻዓ ቃላቱዎ ሃሳዪያዎ፤ ኢቼሹ ቃላቱዎ ታ ዎዛና ቆፋን ሃሳያናው ደሳይ።

20 ታናዳን አማኒያዎንቶ፡ ሂንቲ ኢታ ዬወዎን ጉላ ናና ማላ ጊዳና፤ አቲን፡ ቆፋን ጉላ ናና ማላ ጊደ፣፤ ሂንቲ ጋርሳ ቆፋን ዎዛናማቱዎ ጊዲቲ።

21 ያሳ ማፃፋን፡  
«ጎዳይ፡ ሐኒ ሃ አሳው፡  
ዲማ ዲማ ቃላን ሃሳዪያ አሳኒኔ  
ኢማላቱዎ ዶናን ሃሳያና።  
ሺን ሄዎንካ፡  
ታኒ ጊያዎ አንቱንቱ ሲሲኪና» ያጌ»

ጌቲቲዳ ፃፊ፡።  
22 ሲሚ ዲማ ዲማ ቃላን ሃሳዪያዎ አማኔናዎንቲሲ ማላታ ጊዲያዎ፤ አቲን፡ አማኒያዎንቲሲ ማላታ ጊዳና። ቃሲ ናባቱዎ፤ ሃሳዬቲያዎ አማኒያዎንቲሲ ማላታ ጊዲያዎ፤ አቲን፡ አማኔናዎንቲሲ ማላታ ጊዳና።

23 ህዋ ዲራው፣ አማኒያ አሳይ ኡባይ ኢቲፔ ሸቁዳ፣ ቃሲ ኡባይካ ዲማ ዲማ ቃላን ሃሳዮፔ፣ ታማሪቤና አሳይ ዋይ አማኔና አሳይ ጌሊዳ፣ ሂንቲንታ ኡባ፣ «ጎዪታ» ጌኔ?

24 ሺን ታማሪቤና አሳይ ዋይ አማኔና አሳይ ዋሳ ጎሌ ጌሊያ ዋዴ፣ አሳይ ኡባይ ቲምቢቲያ ኦዶፔ፣ ኢ ባሬ ሲሲያዋን ባሬ ናጋራ አኬኬ። ቃሲ ሄ ሲሴዳባ ኡባንካ ኢ ፐርዳታና።

25 አ ዋዛናን ጌሜዳ ቆፋይካ ቆንጫና። ሃዋዳንካ ቃሲ፣ «ፆሳይ ቱሙ ሂንቲ ጌዶን ዴዔ» ያጌዴ ማርካቲዳ፣ ጉፋኒዴ ፆሳው ጎዪናና።

**አሳይ ኢቲፔ ዋሲያ ዋዴ ዴዓናው ቤሲያ ዋጋ**

26 ሲሚ ታናዳን አማኒያዋንቶ፣ አዬ? ሂንቲንቲ ኢቲፔ ሸቁያ ዋዴ፣ ሁጲያን ሁጲያን፣ ኢቲዋሲ ማዚሙሪ ዴዔ፤ ኢቲዋሲ ታማሪሲያዌ ዴዔ፤ ኢቲዋሲ ሳፃይ ዴዔ፤ ቃሲ ኢቲዋሲ ዲማ ዲማ ቃላን ሃሳዪያዌ ዴዔ፤ ኢቲዋሲ ቢሊያዌ ዴዔ። ኡባይካ ዋሳ ጎሊያ ማዲያዋ ጌዳናው ቤሴ።

27 ኦኒኔ ዲማ ዲማ ቃላን ሃሳዮፔ፣ ላዑ ጌዲዳ፣ ዋይ ዳርፔ ሄዙ ጌዲዳ፣ ካላን ካላን ሃሳያናው ቤሴ። ቃሲ ሃራ ኢቲ ኡንቲንቲ ሃሳዬዳዋ ቢሎ።

28 ሺን ቢሊያ አሳይ ቆዮፔ፣ ዲማ ዲማ ቃላን ሃሳዪያዌ ዋሳ ጎሊያን ጮዑ ጎ። ባሬ ሁጲዉኔ ፆሳው ሃሳዮ።

29 ናባቱካ ላዑ ጌዲዳ ዋይ ሄዙ ጌዲዳ ሃሳዪና። ቃሲ ሃራንቲ ኡንቲንቲ ጌያዋ ሻኪና።

30 ሺን ፆሳይ ሄ ሳዓን ኡቲዳ ሃራሲ ኢቲባ ቆንጨሶፔ፣ ካሴና ሃሳዪያዌ ጮዑ ጎ።

31 አዪሲ ጎፔ፣ ኡባይ ታማራና ማላኔ ኡባይ ሚናና ማላ፣ ካላን ካላን ቲምቢቲያ ኦዶናው ዳንዳዪታ።

32 ቲምቢቲያ ኦዲያዋንቲ ኢሞታይ ኡንቲንቶ አዛዜቲ።

33 አዪሲ ጎፔ፣ ፆሳይ ሳርቲፋ ፆሳፔ ኣቲን፣ ጫቡዋ ፆሳ ጌዴና። ጌሻቱ ዋሳ ጎሊቱዋ ኡባን፣

34 ማጫዋንቲ ሸቁዋ ጋርሳን ጮዑ ጌና። አዪሲ ጎፔ፣ አዪሁዳቱዋ ሃጊ ጌያዋዳንካ ኡንቲንቲ ሞዴታናፔ ኣቲን፣ ሸቁዋ ጋርሳን ሃሳያናው ኡንቲንቶ ማቲ ባዋ።

35 ማጫዋንቲ ሸቁዋ ጋርሳን ሃሳዪያዌ ፖኮ ጌዲያ ዲራው፣ አዬንቶ ኤራናው ኮዮፔኔ ሶዪን ባሬንቲ አሲና ኦቲና።

36 ፆሳ ቃላይ ኮይሮ ሂንቲፔ ዬዴ? ዋይ ሂንቲ ፃላላኮ ዬዴ?

37 ኦኒኔ ባሬና ኮሲያ ዋይ ፆሳ አያናይ ዴዒያ አሳ ያጌዴ ቆፖፔ፣ ታኒ ሂንቲንቶ ፃፊያዌ ጎዳ አዛዙዋ ጌዲያዋ አኬኮ።

- 38 ሺን ኦኒኔ አከካና ቆዮፔ፣ አኬኮፖ ባሺ አጎ።
- 39 ሄዋ ዲራው፣ ታናዳን አማኒያዋንቶ፣ ቲምቢቲያ ኦዳናው ሎይሊ አሞቲቱ። ቃሲ ዲማ ዲማ ቃላን ሃሲያዋካ ዲጎፒቱ።
- 40 ሺን ኡባባይካ ዋጋኒኔ ማራን ሃኖ።

# 15

## ኪሪሰቶሲ ሃይቁዋፔ ዴንዴዳባ

- 1 ታናዳን አማኒያዋንቶ፣ ታኒ ሂንቲንቶ ኦዴዳ ሚሺራቹዋ ቃላ ሂንቲ አኬዳዋኔ ቃሲ ሂንቲ አማኑ አኒ ኤቁዳዋ ሂንቲንታ ቆፔላይ።
- 2 ሂንቲንቲ አማኑ ማላ ጊዳና ቆዮፔ፣ ቃሲ ታኒ ሂንቲንቶ ኦዴዳ ቃላ ሎይሊ ኦይቆፔ፣ ሂንቲ ሄ ሚሺራቹዋ ቃላን አቲዲታ።
- 3 አዪሲ ጎፔ፣ ታኒ ቃሲ አኬዳዋ ኡባባፔ አጳዴ ኮሺያዋ ካሴታዴ ሂንቲንቲሲ አማዲ። ሄዋ አዬ ጎፔ፣ ያሳ ማፃፋይ ጊያዋዳን፣ ኪሪሰቶሲ ኑ ናጋራ ዲራው
- 4 ሃይቁዴ ሞጌቲዳ። ያሳ ማፃፋይ ጊያዋዳንካ፣ ሄዜንሊያ ጋላሲ ሃይቁዋፔ
- 5 ዴንዲዴ፣ ጳዲሮሳው ቆንጩዳ። ሄዋፔ ጉዬያን፣ ባሬ ኪቲዳ ታማኔ ላባቶ ቆንጩዳ።
- 6 ሄዋፔ ጉዬያን፣ ኢቹሹ ጭቁፔ ዳሪያ ባሬና ካሊያ አሳው ኢቲ ካላ ቆንጩዳ። ኡንቲንቲፔ ዳሪያ ባጋይ ሃኖ ጋካናሲካ ፓፃ ዴዲኖ፤ ሺን አማራዳዋንቲ ሃይቁዲኖ።
- 7 ሄዋፔ ጉዬያን፣ ያዩቆባው ቆንጩዳ፤ ጉዬፔ ባሬ ኪቲዳ ኡባቶ ቆንጩዳ።
- 8 ቃሲ ኡባፔ ዉርሴላን፣ ዎዲ ጋኬናን ዩሌቲዳ ታዉካ ቆንጩዳ።
- 9 አዪሲ ጎፔ፣ ዩሱሲ ኪቲዳ ኡባፔ ታኒ ላፋ፤ ታኒ ያሳ ዎሳ ጎሊያ ዎዩሴዳ ዲራው፣ ዩሱሲ ኪቲዳዋ ጌቲታዴ ጃሴታናዉካ ቤሲኬ።
- 10 ሺን ያሳ አጼ ኬካቲላን ታኒ ታናካ። ቃሲ ታው ኢ ኢሜዳ አጼ ኬካቲላይ ማላ ጊዲቤና፤ ሺን ታኒ ኡንቲንታ ኡባፔ አላዴ አላዲ። ሺን ታናና ዴዲያ ያሳ አጼ ኬካቲላይ ኦፊዳፔ አቲን፣ ታና ጊዲኬ።
- 11 ሲሚ ታና ጊደፔካ፣ ዎይ ኡንቲንታ ጊደፔካ፣ ኑኒ ኡባይ ኦዲያዋ ሃዎ፤ ሂንቲንቲካ ሃዎ አማኔዲታ።

---

15:3 እሳ 53:5-12    15:4 ማዘ 16:8-10፤ ማት 12:40፤ ኪት 2:24-32  
 15:5 ማት 28:16-17፤ ማር 16:14፤ ሉቅ 24:34፤ 36፤ ዮሀ 20:19    15:8 ኪት 9:3-6

አሳይ ሃይቁዋፔ ዴንዳናባ

12 ኪሪሰቶሲ ሃይቁዋፔ ዴንዳዳዎ ኦዲያዎ ጊዶፔ፡ ሂንቴንቴፔ ኢቲ ኢቲ አሳቱ ያቲና ዎቲዴ፡ «ሃይቁዳ አሳይ ሃይቁዋፔ ዴንዳና» ያገረኛ?

13 ሃይቁዳ ኡራይ ሃይቁዋፔ ዴንዲቤናዎ ጊዶፔ፡ ያቲና ሄኮ ኪሪሰቶሲካ ሃይቁዋፔ ዴንዲቤና ገያዎ።

14 ኪሪሰቶሲ ሃይቁዋፔ ዴንዲቤናዎ ጊዶፔ፡ ያቲና ኩኒ ኦዲያዎካ ማላ፤ ቃሲ ሂንቴ አማኑካ ማላ።

15 ቃሲ ኩኒ፡ «ኪሪሰቶሳ ሃይቁዋፔ ዴንሌዳ» ያገዴ ያሳባ ማርካቴዳ ዲራው፡ አ ዎርዶ ማርካቴዎ ገዲዴ ቤቲዶ። ሺን ሃይቁዳዎንታ ሃይቁዋፔ ኢ ዴንሌቤናዎ ጊዶፔ፡ ኪሪሰቶሳካ ዴንሌቤና።

16 አዪሲ ጎፔ፡ ሃይቁዳዎንቱ ሃይቁዋፔ ዴንዴናዎ ጊዶፔ፡ ሲሚ ኪሪሰቶሲካ ዴንዲቤና።

17 ኪሪሰቶሲ ሃይቁዋፔ ዴንዲቤናዎ ጊዶፔ፡ ሂንቴ አማኑካ ማላ፤ ቃሲ ሂንቴ ሃዎ ጋካናዉካ ናጋራና ዴዲታ።

18 ሲሚ ኪሪሰቶሳ አማኒዴ ሃይቁዳዎንቱካ ቃሲ ቆዬዲኖ ገያዎ።

19 ኩኒ ሃ ዴዐዎ ያላላው ኪሪሰቶሳን ሂዶቲዳ \* ጊዶፔ፡ ሃ አላሚያን ዴዲያ አሳ ኡባፔካ ኩባይ ሎዔና።

20 ሺን ኪሪሰቶሲ ሃይቁዳዎንቱ ዴንዲዎሲ ባይራ ገዲዴ፡ ሃይቁዋፔ ዴንዴዳዎ ቱማ።

21 አዪሲ ጎፔ፡ ሃይቁ ኢቲ አሳ ባጋና ሃ አላሚያ ዬዳ፡ ሃይቁዳዎንቱ ዴንዲካ ቃሲ ኢቲ አሳ ባጋና ዬዳ።

22 አዪሲ ጎፔ፡ አሳይ ኡባይ አዳማና ኢቲፔቲላ ሜዴዳ ዲራው ሃይቁዳዎዳን፡ ኪሪሰቶሳና ኢቲፔቲላ ሜዴዳ ዲራው፡ ኡባይ ዴዐዎሲ ዴንዳና።

23 ሺን ኡባይካ ባሬ ካላን ካላን ዴንዳና። ኪሪሰቶሲ ኡባፔ ካሴቲዴ ዴንዴዳ፤ ሄዎፔ ጉዪያን፡ ኪሪሰቶሳዎንቱ ኪሪሰቶሲ ዪያ ዎዴ ዴንዳና።

24 ሄዎፔ ጉዪያን፡ ኪሪሰቶሲ ማታ ኡባ፡ ጎዳቲላ ኡባኔ ዎሊቃ ኡባ ቆዪሲዴ፡ ያሳው ባሬ አቦ ካዉቲላ ኢሚያ ዎዴ፡ ዎዲያ ዉርሴላይ ያናዎ።

25 አዪሲ ጎፔ፡ ያሳይ አ ሞርኬቱዎ ኡባ አ ጌዲያፔ ጋርሳና ዎላና ጋካናው፡ ኪሪሰቶሲ ሞዳናው ቤሴ።

\* 15:19 ሂዶታ፡ ኪሪሰቶሳን ኑ ዎሌዳ ኑ ኡባ ሂዶታይ፡ ሃ አላሚያን ዴዐዋሳ ጊዶፔ፡ ሃ አላሚያን ዴዲያ ሃራ አሳቱዎ ኡባፔካ ኩባይ አጂዴ ኢታ፡ ጉሳ። 15:25 ማዘ 110:1

26 ኡባፔ ዉርሱላን ጳዪዳ ዳዒያ ሞርኪ ሃይቁዎ።

27 አዪሲ ጎፔ፣ ያሳ ማፃፋይ፣ «ያሳይ ኡባባ ኣ ጌዲያፔ ጋርሳና ሞዲዳ ሞዲሴዳ» ያጌ። ሺን ኡባባ ኣ ጌዲያፔ ጋርሳና ሞዲዳ ሞዲሴዳ ጊያ ዎዴ፣ ኡባባ ኣሌዳ ያሳፔ ኣቲን፣ ዮኮ ኡባይ ሞዴቲዳ ጊያዌ ቆንጩ።

28 ሺን ኡባባይ ከሪሰቶሳው ሞዴቲዳዎፔ ጉዪያን፣ ከሪሰቶሲ ቃሲ ባሬ ሁጵው ኡባባ ባሬና ሞዲሴዳ ያሳው ሞዴታና። ያሳይ ቃሲ ኡባባ ዉርሲዳ ሞዳና።

29 ሄዎ ጊዳና ጳዮፔ፣ ሃይቁዳዎንቱ ኮታ ፃማቁቲያዎንቱ ኣያ ኣሉዳ? ሃይቁዳዎንቱ ኡባካ ዴንዴናዎ ጊዶፔ፣ ኣሳይ ሃይቁዳዎንቱ ኮታ ኣዪሲ ፃማቁቲ?

30 ያቲና፣ ኮኒ ኡባ ዎዴ አዪሲ ሃሳዬና ሜቱዎን ጌሌቶ?

31 ታናዳን ኣማኒያዎንቶ፣ ታኒ ኑ ጎዳ ከሪሰቶሳ ዬሱሳን ታው ዳዒያ ሂንቲናን ጩቁታዳ፣ ጋላሳን ጋላሳን ሃይቃይ።

32 ታኒ ኤፌሶኔን ኣሳ ቆፋዳን ዱዳና ባፄቲዳዌ ታና ኣያ ማዲ? ሺን ሃይቁዳዎንቱ ሃይቁዎፔ ዴንዴናዎ ጊዶፔ፣ «ሲሚ ሞይቲኔ ኡሾይቲ፤

አዪሲ ጎፔ፣ ኮኒ ዎንቲ ሃይቃና» ጊያዎ ማላ።

33 ጩሜቶፒቲ፤ ኢታ ላጌቲላይ ሎፃ ሃኖታ ባዪዜ።

34 ፂሎቲላኮ ሲሚቲ። ናጋራ ኣላፒቲ። ሂንቲንቲፔ ኢቲ ኢቲ ኣሳይ ያሳ ኤሬና፤ ታኒ ሃዎ ሂንቲንታ ዬላያናው ጋይ።

**ሃይቁዎፔ ዴንዴዳ ቦላ ሃኖታ**

35 ሺን ኢቲ ኣሳይ፣ «ሃይቁዳ ኣሳይ ዋኒዳ ዴንዳኔ? ኡንቲንቲ ኣያ ማላ ቦላና ያኔ?» ያጌናን ኣጌና።

36 ኔኖ ኤያው፣ ኔኒ ጋዲያን ዜሪያ ዜሬላይ ሃይቁናን ሞከና።

37 ኔኒ ዜሪያዌ ዛርጋ ጊዲና ዎይ ሃራ ቆሞ ካላ ጊዲና፣ ኣይፊያ ፃላላፔ ኣቲን፣ ሳሚ ዶሊዳ ኬሲያዎ ጊዴና።

38 ሺን ያሳይ ዜሬላው ባሬ ዶሴዳ ቦላ ኢሜ፤ ቃሲ ዜሬላ ኡባሲካ ሁጲያን ሁጲያን ኡንቲንቲ ቦላ ኢሜ።

39 ሜዴታ ኡባ ኣሹ ኢቱዎ ጊዴና። ሺን ኣሳ ኣሹ ኢቱዎ፤ ሜሂያ ኣሹ ዱማ፤ ካፋቱዎ ኣሹካ ዱማ፤ ቃሲ ሞሊያ ኣሹካ ዱማ።

40 ቃሲ ሳሉዎ ኣሳቲላቲኔ ሳዓ ኣሳቲላቲ ዳዒና። ሺን ሳሉዎ ቦላ ቦንቹ ዱማ፤ ቃሲ ሳዓ ቦላ ቦንቹ ዱማ።

41 ኣዎይፊያሲ ኣ ሁጵ ቦንቹ ዳዒ። ኣጌናሲካ ኣ ሁጵ ቦንቹ ዳዒ። ቃሲ ያለንታቱዎሲካ ዱማ ቦንቹ ዳዒ፤ ኣያው ጎፔ፣ ኢቲ ያለንቲ ዮኮ ያለንቲያፔ ቦንቹዎን ዱማቲ።

42 ቃሲ ሃይቁዳዋንቲ ሃይቁዋፔ ዴንዲያ ዎዴ ሄዋዳን ሃናና፤ ሃይቁያ ቦላይ ሞጌቲዳ፥ ሃይቁና ቦላ ገዲዴ ዴንዳና።

43 ቦላይ ቶሺያን ሞጌቲዳ፥ ቦንቹዋን ዴንዳና። ቃሲ ዳቡራን ሞጌቲዳ፥ ዎልቃን ዴንዳና።

44 ሜዴታ ቦላይ ሞጌቲዳ፥ ጌሻ ኣያናን ካሌሴቲያ ቦላ ገዲዴ ዴንዳና። ሜዴታ ቦላይ ዴዎፔ፥ ቃሲ ጌሻ ኣያናን ካሌሴቲያ ቦላይካ ዴዔ።

45 ሃዎዳንካ፥ ቃሲ ያሳ ማፃፋን፥ «ኮይሮ ቢታኒ፥ አዳሚ፥ ፓፃ ዴዒያ አሳ ገዲዴ ሜዴቲዳ» ያጌ። ሺን ዉርሴላ አዳሚ ዴዐዎ ኪሚያ አሳ ገዴዳ።

46 ሺን ሜዴታ አሳይ ኮይሮ ዩና፥ ጌዶፔ ኣያና አሳይ ዬዳፔ አቲን፥ ኣያናዌ ኮይሮ ዩቤና።

47 ኮይሮ አዳሚ ቢታፔ ሜዴቲዳ፤ ኢ ቢታፔ ሜዴቲዳዎ። ላዒንሱዎ አዳሚ ሳሉዋፔ ዬዳ።

48 ሃ ሳዓ አሳቲ ቢታፔ ሜዴቲዳዎ ማላቲኖ። ቃሲ ሳሉዎ አሳቲ ሳሉዋፔ ዬዳዎ ማላቲኖ።

49 ኮኒ ቢታፔ ሜዴቲዳዎ ማላ ማዬዳዎዳን፥ ሳሉዋፔ ዬዳዎ ማላካ ቃሲ ማያና።

50 ታናዳን አማኒያዋንቶ፥ ታኒ ጊያዌ ሃዎ፤ አሹኔ ሱላይ ተ ያሳ ካዉቲላ ላታና ዳንዳዬና። ቃሲ ዎቂያዌ ዎቁናዎ ላቲና።

51-52 ሲሲቲ! ታኒ ሂንቲንቶ አቲባ ፀራይ። ኮኒ ኡባይ ሃይቆኮ። ሺን ዉርሴላ ፀራምባይ ፑኔቲያ ዎዴ፥ ሊጶዳ ኣይፊ ያላናሲ ዎዛና አሴናን ላሚታና። አዩሲ ጎፔ፥ ፀራምባይ ፑኔቲያ ዎዴ፥ ሃይቁዳ አሳይ ዎቁና አሳ ገዲዴ ዴንዳና፤ ኮኒካ ላሚታና።

53 አዩሲ ጎፔ፥ ሃዌ ዎቂያዌ ዎቁናዎ ማያናው ቤሴ፤ ቃሲ ሃዌ ሃይቁያዌ ሃይቁናዎ ማያናው ቤሴ።

54 ሺን ሃዌ ዎቂያዌ ዎቁናዎ ማዩያ ዎዴ፥ ቃሲ ሃዌ ሃይቁያዌ ሃይቁናዎ ማዩያ ዎዴ፥ ሄ ዎዴ፥ ያሳ ማፃፋይ፥

«ሃይቁ ያኔቲዴ ሚቲቲዳ።

55 ሃይቆ፥ ኔ ዩሻይ ሃቃኔ?

ሃይቆ፥ ኔ ያኑ ሃቃኔ?»

ጌዳ ቃላይ ፖሌታና።

56 ሃይቁ ዲኪያ ዎልቃ ናጋራፔ ዴሜ፤ ቃሲ ናጋራይ ዎልቃ ሂጊያፔ ዴሜ።

---

15:45 ደዎ 2:7 † 15:50 ሃ ሳዓ ቦላ ዴዒዴ አሳይ ማዬዳ አሹዋኔ ሱላ፥ ጉሳይ ሃ አላሚያ አሳቲላ ጉሳ። 15:51-52 1ቲስ 4:15-17 15:54 አሳ 25:8 15:55 ሆስ 13:14

57 ሺን ኑ ጎዳ ዩሱሲ ኪሪስቶሳ ባጋና ኑና ያኒሲያ ያሳ ጋላታይ ጋኮ።

58 ታኒ ሲቂያ ታናዳን አማኒያዋንቶ፣ ሄዋ ዲራው፣ ቃዳናን ሚኒ ኤቂቲ። ሂንቲንቲ ዳቡራይ ጎዳ ባጋና ማላ ጊዴናዋ ኤሪዴ፣ ኡባ ዋዴ ጎዳ ኦሱዋ አዛሌናን ኦሊቲ።

# 16

ዩሩሳሌምን ዴዲያ አማኒያ አሳው ሺቄዳ ሚሻ ማዲዋ

1 ያሳ አሳቶ ሚሻ ሺሻናው ጋላቲያን ዴዲያ አማኒያ አሳቶ ታኒ ቃላ ጌሌዳዋዳን፣ ሂንቲንቲካ ቃሲ ሄዋዳን ኦሊቲ።

2 ሂንቲንቲ ታኒ ያ ቢያ ዋዴ፣ ሚሻ ሺሸና ማላ፣ ሂንቲ ኡባይ ዋጋ ጋላሲ ጋላሲ፣ ሂንቲ ዴሚያ ኬናፔ ሂንቲ ጎሌን ዳጋዪቲ።

3 ታኒ ያ ጋኪያ ዋዴ፣ ሂንቲ አማኒያ አሳ ኦና ጊደፔኔ፣ ሂንቲ አሜዳዋ ጋላና ማላ፣ ዳቢዳቢያና ኡንቲንታ ዩሩሳሌም ኪታና።

4 ቃሲ ታኒ ኡንቲንቲና ባናው ኮሾፔ፣ ኡንቲንቲ ታናና ኢቲፔ ባናዋንታ።

ጳውሎሳ ቆፋቲዋ

5 ታኒ ማቂደኒያና አዳዴ፣ ሂንቲንቲኮ ባና፤ አዪሲ ጎፔ፣ ታኒ ማቂደኒያና አዳዴ።

6 ታኒ ቢያሳ ሃቃ ጊደፔኔ፣ ታ ቡሳን ሂንቲ ታና ማዳና ማላ፣ ሂንቲ ማታን አማራዳ ዋዲያ ጋሚዴናን ኣጊኬ። ዋይ ባልጉዋካ ሂንቲ ማታን ሻጩናን ዋያ አጋና።

7 አዪሲ ጎፔ፣ ታኒ ሃዲ ያና አዳዴ ሄ ኦጊያና ሂንቲንታ ቤዓናው ኮዪኬ። ጎዳይ ጎፔ፣ ሂንቲ ማታን አማራዳ ዋዲያ ታካናው ቆጋፔ።

8 ሺን ታኒ ጳንጻቆስቲ ጊያ ጋላሳይ ጋካናው ኤፌሶኔን ጋሚዳና።

9 ታው ኦሱ ኩሚዳ አኮ ፔንጊካ ያኒ ደዬቲዳ። ቃሲ ታው ጮራ ዋርኬቲ ዴዲና።

10 ደሞቶሴ ሂንቲንቲኮ ዮፔ፣ ሂንቲ ማታን ኢ ያዩናን ዴዳናዳን፣ አ ሎይሊ ኦይቂቲ። አዪሲ ጎፔ፣ ኢካ ቃሲ ጎዳ ኦሱዋ ኦሌ።

11 ሄዋ ዲራው፣ ኦኒኔ አ ካጶፖ። ሺን ኢ ታኮ ሳሮ ሲማና ማላ፣ አ ማዲዴ ሳሮቲላን ዋዪዚቲ። አዪሲ ጎፔ፣ ታኒ ኢ ኢሻቲዋና ሲማናዋ ናጋ ኡታዲ።

12 ሺን ኑ ኢሻ አጲሎሲ ዮኮ ኢሻቲዋና ሂንቲንቲኮ ባና ማላ፣ ታኒ አ ሚኒሳ ዋሳዲ። ሺን ሃዲ ሂንቲንቲኮ ባናው ኮዪቤና፤ ኢ ባሪው ሚኪያ ዋዴ ሂንቲንቲኮ ባናዋ።

ወርሴላ ዞሪያኔ ሳርታ



13 ቤጎቲቴ። አማኑዋን ሚኒ ኤቂቴ። ፃሊቴ። ጎቢቴ።

14 ኦሱዋ ኡባ ሲቁዋን ኦሊቴ።

15-16 ታናዳን አማኒያዋንቶ፣ ኢሰጂፋኖሲኔ አ ሶይ አሳይ ገሪኬን ኮይሮ አማኔዳዋንታ ገዲያዋኔ ፆሳ አሳቱዋሲ አላናው ባሬንታ አሜዳዋ ሂንቴ ኤሪታ። ሂንቴንቱካ ኡንቱንቱ ማላ አሳሲኔ፣ ኡንቱንቱና ኦሊያ ኡባው ዳቡሪያ ኡባው ኤኖ ጋናዳን፣ ታኒ ሂንቴንታ ዋሳይ።

17 ኢሰጂፋኖሲ፣ ፓርደናዊሲኔ አካይቆሲ ሂንቴ ባይናሳን ታና ቦራሲሲቤና ዲራው፣ ኡንቱንቱ ዩሳን ታኒ ናሼታይ።

18 ኡንቱንቱ ሂንቴንታ አያናን ሚኒሴዳዋዳን፣ ታናካ አያናን ሚኒሴዳ ዲራው፣ ሃዋንቱ ማላ አሳቱዋ ደጎፒቴ።

19 ኢሲያን ደዲያ አማኒያ አሳይ ሂንቴንታ፣ «ሳሬ፣ ሎዔ» ጊና። አቁላይኔ ጲሪሰቁላ ባሬንቱ ሶዪን ሺቂያ ዋሳ ጎሌ አሳናካ ሂንቴንቶ ጎዳ ሳርታ ዋዛናፔ ኪቲኖ።

20 አሻቱ ኡባይ ሂንቴንቱሲ ሳርታ ኪቲኖ።

ኢቱ ኢቱዋና ጌሻ ዩሬታ ዩሬቲዴ ሳርቱቲቴ።

21 ታኒ ጳጤሎሲ ሃ ሳርታ ታ ኩሺያን ፃፋዲ።

22 ጎዳ ዩሱሲ ኪሪሰቶሳ ሲቁና አሳይ ዴፆፔ፣ ኢ ሼቁቴዳዋ ጊድ። ኑ ጎዳው፣ ሃያ።

23 ጎዳ ዩሱሲ ኪሪሰቶሳ አቆ ከካቴላይ ሂንቴንቱና ጊድ።

24 ኪሪሰቶሳ ዩሱሳን ደዲያ ሂንቴንቱ ኡባና ታ ሲቁ ጊድ። አማንዒ።

## **Ooratha Caaquwaa New Testament in Dawro (ET:dwr:Dawro)**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Dawro

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 1 Oct 2024 from source  
files dated 29 Jan 2022  
585b63ca-b8e6-55c8-bfef-10bdc95ad69c